



西江志卷第一百四

仙釋二

吉安府

晉

王子瑤字大臯華陰人懷帝永嘉中自玉笥至泰和即黃茅岡築壇醮錄感白鶴翔舞事聞賜名白鶴觀給錢千緡買田贍之後東遊見義山心喜就洞口建壇禮斗誦黃庭經於是玉女降九鼎丹方修煉四十八年白日昇天安廬陵志永興觀永嘉元年王子瑤居此自言子喬為其兄後仙去

改觀曰王仙

玉堂閑話

盧度字彥章始興人有道術少隨張永北侵魏永敗魏人追急阻淮水不得渡心誓曰若得免死從今不復殺生須臾



西江志 卷一百四
見兩楯流來接之得渡遂隱居廬陵西昌三顧山鳥獸隨
之夜有鹿觸其壁度曰汝壞我壁鹿應聲去屋前有池養
魚皆名呼之次第來取食乃去逆知死年月與親友別永
明末以壽終 豫章書

楊善晉時雲遊至廬陵東山真常觀適歲旱於東城植竹為
壇以禱雨大澍遂於山下結茅居焉道成脫化今懸崖石
上有迹可徵 名勝志

魏夫人諱華存字賢安任城人司徒魏舒女也少讀老莊春
秋三傳五經百子常別居一園獨立閑處服餌胡麻父母
偏之強適太保公掾南陽劉幼彥疇昔之志存而不虧後
幼彥為修武令隨之縣舍 按豫章書及舊志則云生二子
璞瑕後瑕為安城太守夫人因
修真浮 閉齋別寢忽夜半有真人降青童君云此清虛真
仙觀

人者爾之師也當受業焉景林真曰爾應為紫虛元君上
真司命南嶽夫人也清虛真人王君授以太上寶文八經
隱書等三十一卷後仙去 內傳 瑕二女為思微二真人亦煉
丹於丹霞觀今丹石尚存風月之夕光彩爛然 豫章書

唐

匡智長安人貞觀間棄妻子與姪大郎往廬山修煉居七日
有老人曰此山陰地仙不可得南有名山陽地可往居之
乃至吉州望見義山忽有樵夫引二人登山曰此山安穩
勉力精修遂於送龍洞尾立第二壇朝夕禮斗既數年中
元節上帝降仙衣智服之足下雲生上昇而去大郎更立
第三壇亦朝夕禮斗次年七月七日尸解事聞敕鄉人祀
焉 胡澹菴碑記

蕭靈護字天祐廬陵人自少好道每賑人之急嘗遊嶽麓遇
鄧真人授以火鼎黃白之術遂精內學高宗弘道二年中
秋忽語其徒曰吾將往矣是夕尸解 豫章書

蓑衣仙嘗衣蓑衣初詣玄妙觀已而來遊清華道士張天全
內之一日呼天全與俱行天全不欲遂辭去歎曰此人為
青面老子悞一生青面老子謂辛天君也有人自嶺南來
寄書天全乃與天全別同日也 安志

南唐

沈廷瑞彬之次子也有道術嗜酒却粒寒暑一單褐數十年
不易跣足日行數百里林棲露宿多在玉笥浮雲兩山老
而不衰後不知所終 南唐書

宋

李思廣字景淵吉水人放意山水間得錢即易酒或醉臥市
中政和四年來螺川止習溪橋有酒姬頗異之每飲不問
其直久益不替一日忽謂姬曰我當別得奉書報謝晨起
視則已死體發熱如生召所親葬之後有自衡嶽來者為
景淵致書謝姬郡少年發其塚獨有空棺 安志
徐神翁海陵人崇寧間來遊安福北真觀忽江漲徐飛巾水
上渡江去 同上

元

劉洞誠安福人元初學道於武當山道成隱居吉安城西玉
泉觀能驅役鬼神使之立現至禱雨治病其應如響 安志
真火符者元初遊永和市年九十餘雙瞳炯炯夜能蠅頭細
書當夜必潔室以水沃地方布席散髮偃臥其上明日地

西江志 卷一百四
猶濕惟臥處乾竟莫知其終也 同上

劉真人思敬吉之青原人少落魄不羈嗜酒好長生術及長遊蜀中從靈寶陳君受丹砂訣行混元之法徧歷諸名山年五十始入龍虎山為道士自號真空子尋主毓和道院鍊鉛汞為丹砂服之者疾良愈至元十八年世祖召對稱旨上苦足疾進六甲飛雄丹吞之而瘳復召問曰卿壽幾何對曰踰七十矣曰卿顏何童耶對曰亡思亡慮勿撓其氣唯一唯純以守吾真上悅賜葡萄酒飲之每賜輒醉醉輒仆地而臥嘗以真神仙稱之居八年乞還山中賜以銅簡鐵笛及百衲袍之屬暨還結八卦菴於琵琶峰右月夜往往出坐磐石上持鐵笛吹之依稀作鸞鳳鳴二十八年八月呼陳鍊師與之劇飲曰我明日將死故與子醉別明

日叩門無應者力排而入已側卧而逝矣至正間制贈凝

妙靈應真人 宋景濂集

明

趙元陽名宜真其父仕元為安福令因家焉幼穎敏習進士業例試入京以病不能赴夢神人曰汝神仙中人何望世貴遂從塵外遊師李元張天全結茅匡山居之於正乙天心雷奧全真還丹之旨多所發揮洪武壬戌正月朔謝眾曰自今閉關以還吾真慎無干焉五月三日夏至啓關漱浴更衣趺坐呼弟子於前書偈畢雷電交飛風雨晦冥乃翛然逝明日縣官士庶觀者雲集以棺殮肢體屈伸顏色如生著有詩詞歌論若干篇其徒甚眾續承道脈者劉淵然一人而已

豫章書

元陽宋武功王昭德十三世孫也景泰

六年贈崇文廣道純德原陽趙真人 贛州府志

唐

四祖道信大師姓司馬氏隋大業十三載領徒至吉州值羣盜圍城七旬不解萬眾惶怖師愍之教令念摩訶般若經時賊望雉堞間若有神兵乃相謂曰城內必有異人不可攻矣稍稍引去 景德傳燈錄 唐武德中駐錫潮山日坐禪寶峰之下石室中結菴山巔菴成江水逆上至菴前其聲急若潮因名潮山 舊通志 謚大醫禪師塏曰慈雲 正宗記

弘濟名行思 舊志云姓劉氏安福人 幼出家參曹溪六祖歸住青原山

靜居寺 指月錄 開元二十八年陞堂告眾跏趺而逝僖宗謚

弘濟禪師塏曰歸真嗣六祖尊者 稽古錄 靜居寺有祖肉身

塏水旱疾疫祈之輒應 青原山志

三刀法師姓曹廬陵人出家吉州龍興寺常以竹筒盛金剛經佩誦之時安史亂吉州刺史劉寧選充行營小將非其好也遂亡捕獲之令斬於朱木橋三刀俱折劉怪問之答以持金剛經問經何在曰被獲時遺墮墮於百步得之竹筒有刀痕而幾絕劉稱歎久之乃縱其為僧奏聞敕號三刀法師 豫章書

應真住吉州耽源山南陽國師慧忠法嗣忠於代宗大曆十年以化緣將畢乃辭帝曰告檀越造取一所無縫塏帝請塏樣師曰貧道去後有侍者應真知之塏葬於黨子谷詔應真問前語真良久曰聖上會麼曰不會真述偈曰湘之南潭之北中有黃金充一國無影樹下合同船琉璃殿上無知識 傳燈錄

西江志 卷一 四
至誠泰和人少於荆南當陽山玉泉寺事神秀秀之徒衆往
往譏南宗曰能大師不識一字有何所長秀曰他得無師
之智深悟上乘吾不如也且吾師五祖親付衣法豈徒然
哉吾不能遠去汝等可往曹溪質疑師遂至韶陽隨衆參
謁不言來處時六祖告衆曰今有盜法之人潛在此會師
出禮具陳其事即誓依歸乃呈一偈祖然之尋回玉泉同
上

南唐

無殷福州人姓吳氏七歲依雪峰真覺出家年滿受戒遊方
抵筠陽謁九峰峰許入室初住禾山大智院學徒濟濟述
垂戒十篇江南李氏召問曰和尚何處來師曰禾山來曰
山在什麼處師曰人來朝鳳闕山嶽不曾移國主重之命

居揚州祥光院復乞入山命師於翠巖上藍兩院往來闡
法號澄源禪師傳燈錄

宋

南安巖主姓鄭氏號定光泉州同安人年十一出家建興寺
保大元年至廬陵叅西峰豁禪師後至泰和懷仁渡值暴
漲人曰此江畔高漚潭有蜃出爲民患師乃投偈潭中曰
溪澗豈能留得住終歸大海作波濤翌日水退洲起今龍
洲是也名勝志

溫受龍泉人得念佛三昧不依師落髮自言吾即佛母故時
人以道者稱之至道元年入傳擔山結茅菴以居撒菜豆
粟子於山皆茂結山多虎道者出入不忌或卧於山虎見
則坐而守之有時入巖罅中取蓮藕花果遣人雖多亦辦

有藍土二行者繼來師事之一日謂鄉老蕭應求曰吾有
 替人當遠去可來敘別亟視之則長揖趺坐塏中命眾人
 共封錮之約七日開既開已失所在獨遺一布巾雙草履
 應求之弟浩以網運至陳留市見之笑語如平生附三書
 與應求及二僧其後藍行者坐化土行者隱葬於石函一
 月開示之亦不見其處

安志

文悟泰和人姓劉氏自幼不茹葷比長為念佛善友時青原
 信道風鼎盛因落髮師事之暨信順寂徧歷禪會復還青
 原住吉水南岡明教典通儒書住六年去之巘山得源菴
 坐定良久乃索紙筆書四頌以辭永豐吉水泰和三邑道
 友時紹興四年閣維得舍利極多舌根與齒不壞叩之作
 銅鐵聲熟視耿耿有光其徒塏而藏之有語錄二卷

府志

進英姓劉氏泰和人出家龍安寺悟法於廬山歸宗真靜禪
 師得語言三昧佛印禪師名之曰英鐵嘴政和四年住衡
 州花藥寺有報恩語錄一卷花藥語錄一卷

安志

集道者泰和真如菴僧也禮巨菴為師有道行一日辭師遠
 遊叅學至廬山圓通崇勝禪寺悟道每日積柴一片既滿
 室辭眾架柴自焚其身火中出偈云真如集道者萬緣都
 放下四方八面任縱橫一輪明月當空挂噫誰肯當眼觀
 者所遺舍利立塏尚存

豫章書

齊禪師住吉州青原六祖下十四世石門易嗣也從雲蓋智
 禪師出家執事首座後徧叅至石門印契示寂日說偈遺
 眾曰昨夜三更過急灘灘頭雲霧黑漫漫一條拄杖為知
 已擊破千山與萬山

指月錄

超宗禾山慧方禪師也六祖下第十五世臨濟派也舉拂子
曰看看祇這箇在臨濟則照用齊行在雲門則理事俱備
在曹洞則偏正叶通在潙山則暗機圓合在法眼則行止
惟心若要抵敵生死則霄壤有隔指月錄

法光姓羅氏泰和人喜為詩從蘇養直遊祝髮於大潙空印
得法於死心靈源以朝命住嶽麓安志

蕭禪師永新手力也嘗往慶雲寺夜宿聞鄰僻有相語者云
院主明日欲烹我飼蕭手力你自照管莫著鷹鷄狐狸打
却蕭起窺乃一鷲對小鷲作人語耳詰旦寺僧果欲殺鷲
因求免乞鷲歸養之後出家得法與鷲同昇化同上

止觀能仁寺僧有僧問曰聞師以紙為確然乎曰然曰漏了
如何曰涓滴不漏打破了如何曰若教打破遍滿虛空同

上

宗受住能仁寺有二童子嘗來廚中索飯一日師出執饌者
怒其亟來弗與二童子跳入井中水為迸湧眾懼奔告師
以木盤掩井跣趺井上坐化水得不湧眾乃知二童子蓋
龍也豫章書

性空居士姓羅名熙明吉水人少為蜀商遊峩峩悅之喜學
浮圖道術六十餘喪父母絕葷酒棄家潛姓名重慶真武
山中子通挾厚貲物色之居士一日謂其徒曰明旦有遠
人來善視之比曉通至號泣請還不答頭觸地血流被面
如是三日不輟居士慰之曰汝第歸某月日汝已得子所
挾物慎無留此作祟也通誓死不去則取所畫已像書偈
指謂通曰吾非汝父此為汝父能生活汝者謹奉持以行

遂絕口通不得已長號返舟經黃陵灘風濤倏起同侶盡溺忽憶居士語抱軸浮水而得免至家子秀章生訊月日俱驗後居士年九十有二召山人周良授書二編且曰某日吾歸此編將以相報其一俟吾孫秀章來與之至期沐浴端坐而逝七日面如生秀章所得書乃居士語錄其授良者祕不示人咸疑異書云

安志

元

普照姓曾氏名福可泰和人既長北遊禮澤菴師更名行滿號南山自是處叢林益有名成宗召見賜賚極厚賜號佛慧鏡智普照大禪師仁宗朝制授銀青榮祿大夫司空復命趙孟頫記其功德

安志

天如諱惟則永新西亭鄉人幼祝髮入禾山遊虎丘得中峰

宗旨精究禪微禾山僧遣其徒迎之天如曰彼中自有打鼓人矣遂不歸住姑蘇獅子林善詞賦四海名流靡不重其超詣所著有楞嚴會解淨土或問禪宗語錄十戒法圖說天如集雲陽李提舉祁臨川危學士素序之

稽古錄

賀氏女釋也永新人嫁同邑江安行有二子既寡即不茹葷日誦圓覺經不少輟或勸更誦他經賀曰要知真性本圓本覺出此即非佛義我非專誦經者聊寄心耳後子楹登第為賀州僉判迎母至官所賀忽語其婦曰吾誦經了無夢想近夜常見瑞光中有猊座欲昇之未果今閉目便見此相矣其歲五月沐浴更衣翌日食罷盥漱忽收足端坐兩中指結印瞑目而逝郡守范直清率其屬瞻禮歎曰丈夫不能如此令畫工寫像惟目睛未點乃禱曰精神全在

阿堵中願賜開示俄兩目炯然子孫扶視皆謂未死頃間復瞑年七十七矣

豫章記

明

白雲居武功誦法華經忽覩五色盈空天花亂雨遂大悟杖策峰頂見大蟒蟠石上為說偈蟒點首而去弟子真香上山途逢虎見公護之虎遁比至公方出定山無水公禱之井泉湧出胸前有肉眼黑白分明一日珠自墮侍者持獻公曰非我珠也旋拈瓦礫示曰此是我珠僧臘八十有四忽集衆說偈端坐斂衣而逝著有牧牛圖說

安志

非空王姓永新人祝髮東山師事無詰謹戒律善詩歌行草有晉人法學士解縉與友善著有翠微集

府志

天真首叅五臺孤月又叅妙高峰更名明果應羅文恭請遂

為石蓮洞開山之祖

石蓮洞棲禪志

無學廬陵良家子也常住西峰寺往來酒肆中丐食得飲輒醉醉則謹呼跳躍遇人詈罵人毆辱之亦不為動或以葷腥進給曰菜則食曰雞猪則弗食莫喻其意皆以為狂僧也工詩善書見鄒南臯畫像拈筆題曰烈著都門名噪天下世人見之謂是仗節死義之臣無學視之仍是水田老者示寂於九江火其骨投之江一夕風雷大作沙石湧積墳起其處人稱為無學洲

安志

大然號笑峰江寧人倪姓名嘉慶天啓壬戌進士為戶部郎以黨事下刑部七年單拈趙州無字叅題事白不起遂薙染一日整花架花刺著臂驚為蜂蠆覺而大笑遂豁所疑後印證浪丈人遂受法住青原山有衣鉢塢

同上

西江志 卷一百四
大智字無可號藥山愚者桐城人方姓名以智崇禎庚辰進士授編修超然遠引歷滇黔返棲壽昌師神穎秀發得法浪丈人住持青原十餘年卒於安福縣塢歸浮山 同上

撫州府

晉

王郭二仙顏真卿云爲方平從弟族弟又云同胞雙生一從父姓一從縣令之姓吳曾云晉時士大夫棲隱巖壑此或然也至今臨川臨山有集仙觀亦曰仙臨觀因二仙曾臨其上故名崇仁華蓋山有浮丘先生壇爲二仙上昇之所浮丘不知年代或曰黃帝時與容成子遊或曰漢書浮丘伯楚元王申公所從受詩者也晉時由金華山之華蓋山吐氣成橋度王郭二仙故今崇仁華蓋並祠之 名勝志

唐

黃令微臨川人少好道風神卓異天然絕粒年十二度爲天慶觀女道士年八十髮白面紅如處子屣履而行奔馬不及聞魏夫人仙壇在本州求之不得後訪於胡天師超乃得於所居之南二百步烏龜原中姑嘗於想像間忽有告曰壇南九曲池汝可開之姑從而獲焉磚砌盡在他日夢有人謂曰井山道場何不修葺遲明入山果獲壇殿餘址半峰有自然石井深可三尺濶丈餘故名井山姑旣建置精舍聞仙樂之音環壇數里莫敢樵採人或不潔必遭蛇虎怪異之難有野鹿爲獵人所射姑爲拔箭每至齋時即銜蓮藕以獻開元九年欲上昇謂弟子曰吾棺不用釘可以絳紗幕之數夕雷電震繞視紗頂孔如雞卵屋穿容人

棺中惟有被覆木簡而已弟子奠瓜尋生蔓數尺結實如
桃弟子黎瓊仙親覩其事後亦仙去麻姑仙壇記 宋元符二年
封妙遠真人 林志

吳自宜雲蓋鄉道士 先屬吉州今屬樂安 垂拱中居礪岡以瓦壺貯丹

瘞楓樹下而沒後有雲覆山頂縣令聞於朝命改鄉為雲
蓋觀為吳仙又改觀為仙遊 府志

宋震臨川人為彭澤令入修山得梁道士尉文光丹藥爐鼎

遂以黃冠隱山中仙去 安志

戚姑戚文秀之女師吳元朗年十八乘雲去山有戚井里人

禱雨輒應 同上

陳雲布字宣威開元中舉博學宏詞祿山兵起避地至郡棲
於今宜黃之綿谷能呼龍致雨武宗封通玄悟真先生年

百餘歲沐浴而逝子萬匡奉棺以葬至半山棺開寸許惟
存簡履今妙常觀有唐碣存焉 同上

宋

饒洞天臨川縣掾淳化中夢神告曰汝心公平名已動天遂

修道有羽士告以宜見譚紫霄訪之數年遇於南豐一日

語其徒曰羣仙會綠竹峰余被召遂別去不知所終 同上

晏穎元獻弟也童子時有聲真宗朝召試賦八沼瑞蓮賜出

身授奉禮郎穎聞報閉書室高卧家人呼之勿應扃鎖就

視則已脫去旁書一紙云江外三千里人間十八年此時

誰復見一鶴上遼天 同上

李洞元豐中宜黃鄒極好方士洞往謁一日乘醉求臥授以

珊瑚枕碎之極不悅翌日復至索破枕粘以膠復完如故

復索酒強極同飲不覺竟日尊未嘗益而酌之不竭夜分
乃去明日酒甕不動而竭者三已怪之復邀同遊曹黃二
山極不欲往洞於照壁畫樓閣叱之戶開洞躍入不見畫
亦不存後二年極卒洞至影堂指像言曰向時招公同遊
今乃爾耶咄咄久之已而失洞所在 同上

元

雷思齊字齊賢臨川人出家種湖觀授元教講師嘗註莊子
草廬贈之詩曰鈎探十翼象外意羅絡三倉篇外文道德
五千聯貫密逍遙第一寸銖分此邦何有王元澤後世詎
無楊子雲吾取二書還註我何當商略重云云所著有空

山漫稿

同上

李商弼字良佐臨川人一日有數道人叩門求作白蓮菴記

援筆而就頗歡噓有頃坐逝父母哭之起而慰曰某兄弟
幸多死生命也既瞑一道人撫其背曰檀越生好處復瞪
目厲聲曰大法本無生滅葬時衆輿出城忽輕如羽時年
二十二揭曼碩作四友詩李其一也 同上

明

張中字景華臨川人好戴鐵冠初以春秋應舉不第遂放情
山水遇異人授以太極數學與人言避兵之方從則吉違
則凶歲壬寅明太祖下豫章鄧愈因薦中召至問曰余定
豫章兵不血刃市不易肆生民自此蘇息否曰未也旦夕
此地當流血廬舍焚燬殆盡即鐵柱觀亦當僅存一殿耳
及指揮康泰反一如中言陳友諒圍豫章三月不解上舉
兵伐之召問中對曰五十日內當大勝亥子之日獲其首

領其戰必在南康達彭蠡常遇春與敵戰於康郎山被圍
僉謂不可救中曰亥時當出如期果出友諒中流矢死兩
軍皆未覺乃密奏曰友諒死矣顧其下未知猶爲之力戰
請遣死囚持祭文往哭之則彼氣奪而吾事濟矣上從之
降其衆五萬後居都下數年一日無故自投於大中橋水
死命求其屍不獲已而潼關守奏云某月某日鐵冠道人
杖策出關正其投水日也後建文時復見於金陵歌曰莫
逐燕逐燕自高飛高飛上帝畿遂有靖難之事後不知所
終 豫章書

按明史本傳所載中數學略同但金陵一歌惜其失載
故從豫章書

唐

石碧名慧藏宜黃人本以射獵爲務因逐鹿過馬祖菴前祖
乃逆之師問還見鹿過否祖曰汝是何人曰獵者祖與之
詰辨師遂擲弓投祖出家後嘗以弓箭接機 指月錄

白楊臨川人姓王名仙林元和中出家白楊寺功行動苦歲
旱鍤地則泉湧民資灌溉與普潤禪師遊一日聞潤化於
長沙即彈指倚鍤而化推之仆地折齒屍自起立里人投
其屍於水三日泝流故處衆異之泥其骨而祠焉 名勝志

普慧會昌中至宜黃白土寺舍委遜家問其名不答曰頗憶
由饒州來故人以饒公稱之後坐亡於白土山之水濱上
嘗有雲氣遜神之以香泥傳其全身龕於寺之西廂曰饒
氏菩薩有禱輒應隆興初郡守張孝祥上其事賜號普慧
加封慈應 名勝志

西江志 卷一百四
白雲名匡仁住金谿疎山寺號圓寂禪師青原行思第五世
洞山良价法嗣也師手握木蛇有僧問手中是什麼師提
起曰曹家女遷化時說偈而逝著有四大等頌略華嚴長
者論 景德傳燈錄

元證名本寂泉州莆田人姓黃氏行思第五世良价法嗣也
於福州靈石山受戒咸通初洞山价坐道場往來請益後
密印所解乃辭洞山去住撫州曹山後居荷玉山天復辛
酉告寂壽六十有二謚元證大師塏曰福圓 景德傳燈錄
五代

月輪姓許氏福州福唐人也青原行思下夾山善會法嗣初
投本郡黃檗山觀禪師稟教及圓戒品謁三峰雖問答有
序而機緣靡契尋叩夾山受印依附七年往撫州卜龍濟

山隱居玄侶雲集師遂演夾山奧旨名聞諸方後歸臨川

樂棲黃山同光二年示寂塏於院西北隅 傳燈錄

證空臨川郭氏

林間錄
姓江氏

名居遁年十四入嵩嶽為僧叅翠微

德山不悟復謁洞山价遂悟道嘗自寫半身影其徒贊之
曰日出連山月圓當戶不是無身不欲全露同光元年秋
夜有星隕方丈前趺坐而化 安志

紹修青原行思第八世下桂琛法嗣初與法眼同叅地藏後
居龍濟山不務聚徒而學者畢至 傳燈錄

宋

寶月熙豐間來金谿之白華巖居絕頂持戒誦經猛獸馴伏
客至則遣去李生無咎慕師之風棄儒從之 輿地紀勝

瀉山臨川人聞氏名慕詰翠巖可真法嗣也母夢神僧授以

寶鏡暨生白光照室祝髮於南豐之永安及謁可真言下
大悟真入寂乃往瀉山每粥罷放參常自役作不眠者四
十年紹聖初住智海院哲宗召見延和殿及示寂書偈曰
昨夜三更風雷忽作雲散長空前溪月落有舍利塏在汴
城東

安志

陳遷字德升宜黃人年十六遊金陵以強記聞荆公命與陸
農師徧閱蔣山碑無慮數十及歸錄之不遺一字越二年
因病留蔣山與勇禪師言下有契勇與偈曰猢猻兒子太
惺惺愛弄千年鬼眼睛不見宰官身說法時時求我頂頭
行即棄儒歸隱究心禪學作續傳燈錄

同上

如璧臨川饒氏子初名節字德操博學能文後之穀城香巖
寺聽智海說法而悟遂落髮陳瑩中與詩云舊時饒措大

今日壁頭陀借問安心法儒禪隔幾何先是師有詩云閑
攜經卷倚松立試問客從何處來因號倚松道人嘗以詩
勸呂紫薇曰向來相許濟時功大似頻伽餉遠空我已定
交木上坐君猶求舊管城公文章不療百年老世事能排
兩頰紅好貸夜窻三十刻羗牀趺坐究幡風始德操攜一
僕往襄鄧間僕亦竊聽說法日有開悟遂祝髮名如琳病
死好事者爲作舉火疏曰無復挾書更逐康成之後豈憂
成佛不居靈運之先德操所著有倚松集

宋釋史

無相姓胡名妙明臨川染家子善知識教其面壁靜坐遂有
悟頓能文名公多與之交象山一日講易無相在座象山
問理會得否無相曰三晝未分消息露六爻纔動錯商量
晚年結菴常清觀之西趺坐而化

安志

元

孫禪師臨川明水寺僧天曆二年旱鄉民請師禱三日不雨遂積薪自焚雨大作屍不燬漂屍寺前止石巖下巖乃黃華姑所居異之為立祠府志

明

無明裴氏子先是西竺有再來之識師嗣事廩山亦隱居壽

昌道契單傳為中興洞宗第一安志

九峰和尚姓袁年二十四出家石鼓菴初不識字軍峰僧口

授以楞嚴心咒六字作務間持誦不懈年四十邁疾幾殆

忽甦遂偈說疊疊皆成妙義時天齊幽隱彭山師往證之

契若水乳年七十作偈更衣而逝塋於菴右同上

建昌府

漢

麻姑王方平之妹修道得仙嘗與方平降蔡經家姑手指似

鳥爪經心中念背癢時得此爪爬之乃佳方平即使人牽

經鞭之曰麻姑神人也何敢如是又曰此鞭亦不易得宴

罷命駕昇天而去後居建昌山中故號麻姑山唐開元中

立廟累封虛寂沖應真人顏魯公有碑記宋咸平二年賜

太祖御書一百二十軸於仙都觀曾鞏作三門記名勝志

蔡經王方平過其家語經曰爾生命應得度世然爾少不知

道今氣少肉多當作屍解耳屍解一劇須臾如從狗竇中

過也告以要言而去經忽體熱如火欲得水灌舉家汲水

灌之如沃焦石如此三日中消耗骨立乃入室以被自覆

久之視其被中皮頭足身具在如蟬蛻去後十餘年忽還

家云七月七日王君當來過至期果來經作數十斛飯羅
列庭中方平去後飯皆盡亦不見人食之

列仙傳

蔡經宅在

南城縣

宋建昌軍治紀略

陳尉居蔡經家舍之北當罷尉時聞經家有神仙乃詣門求
見方平令向日立從後視之曰君心邪不正終難以仙道
當授爾地上主者之職臨去給以一符并一傳著小箱中
言此不能令君度世可令竟君本壽出百歲也後尉壽一
百一十歲後蔡經復暫歸家方平有書與尉字廓落大而
不工先是人無知方平名遠者因此始知之

安志

唐

鄧思瓘號紫陽臨川人開元中應召能使神兵以却西戎雷
霆中隱隱見焉西戎退帝益神之二十七年感虎駕雲車

而化玄宗作輓詩刻石先是遣中使送襯還麻姑山明年

改葬棺中惟玉簡香爐而已

名勝志

鄧德成紫陽姪也嘗隨紫陽侍禁中玄宗奇其穎異以巾簡
授之曰他日必為教主紫陽既化召至禁中時石堡為邊
患請燃燈七盞以象北斗焚香冥祝一燈飛去若流星而

石堡城中正以此夜灰燼云

雲溪友議

伍之奇有道術卓杖成泉名秦龍池

安志

饒廷直南城人第進士嘗過武昌黃鶴樓遇異人得祕術自
是不近妻妾翛然端居後為鄧州通判卒及葬舉棺甚輕

知為尸解云

明一統志

宋

冷真人寄跡張洞宣沖寂觀內一日與縣尉王博文別乃坐

蛻於巖前樟樹穴中其貌如生 名勝志

王文卿字安道即王侍宸也宣和初渡江遇異人授以五雷

法揚州早詔求雨師仗劔嘆水曰借黃河水三尺後揚州

奏得雨水皆黃濁自書棺曰此身是假松板非真牢籠俗

眼跳出紅塵書畢卧棺中是夕風雷交作厥明視之已解

化矣 景泰郡志在京能治婦人離魂事載雜錄 夷堅志南豐縣東

北五里神龜岡為文卿尸解之地 名勝志

毛道人南城人少年不娶父母既終遠遊三十年還家寡言

笑屢同客夜坐一伸欠則光自其口出富家慕道者杳無

一言與之善者怪而問之應曰吾藜藿之腸何能陪膏粱

之腹與讀書人掉書語哉其意乃拒之耳慶元元年坐亡

於南豐逆旅焚化時骨皆連環不斷仍得一物如錢大色

白如玉雪堅而瑩隱然通明有人影跣趺而坐 夷堅志

明

胡古厓新城人仁宗鎮南畿時徵至命禱旱應時而雷雨作

嘗建醮羣鶴繞壇上異之欲受其術乃以清虛非王者事

對後北迎嗣統欲與俱行懇乞歸命主武當山賜袍笏兼

賜詩曰三島千年客四海一閑人殘藥活雞犬靈香出鳳

麟飢餐石中髓困卧天邊雲逍遙玉清境榮遷金簡文月

白風清夜相期泛蓬瀛 安志

大腹子萬曆乙亥丙子嘗遊盱乞食城市言人禍福多中所

乞錢米隨手轉施羅近溪禮敬之後不知所終 同上

唐

上弘紀禪師姓饒氏大曆中肄業景雲寺與婁相國輔刺史

西江志 卷一百四
顏真卿本道廉史楊憑章丹友善善講四分律坐甘露壇
度男女萬餘人安師年十五從舅氏剃落二十二從南嶽
大圓具戒貞元初居洪州龍興寺說法元和十年示滅於
東林精舍名勝志

崇儼得法於石霜楚圓和尚住太平禪院升堂日會者萬計
據牀安坐如鐘鳴如谷響重昏宿霧冰解雪釋李觀太平
寺記

謝禪師天祐二年自閩中來開山於南豐縣東覺源寺一日
以兩缸相合坐化囑小師於七日後開缸先二日開之禪
師即步入化城寺跏趺而逝塋在寺洞中名勝志

宋

有誠字無妄住南城崇聖寺中最善講華嚴經治平中自南

城赴張安道之請講於東都左街萬歲院後住東都覺嚴

寺歷席最久林間錄

景祥姓傅氏南城人永新令翼之子少警敏嗜學廣記道人
有琦者說法靈鷲祥往聽之乃悟削髮叅禮名師受戒後
進明湘真如法席心法益明四方迎請俱不受建炎末避
地天台不得已從閩帥大吉山之請行未越境為范丞相
挽留奏居浮山久之出其古衲并書付其嗣法昇跏趺而
逝得五色舍利目睛齒舌皆不壞及素珠存焉淳熙郡志

明

行保南城人幼慕禪教入慈真院為僧戒行老成言訥心明
洪武中住持演法天寧寺大振宗風叢林歸之後舉天下
高僧十一人行保與焉明一統志

孤月居廣信月峰山後移錫從姑山欲返山中道經頂山寺
 隨者百餘人邀入寺談法乃沐浴更衣作偈示眾頌畢竟
 寂時眾見烈燄中異光一道上逼斗牛間於瓦盆中得舍
 利一顆精光煥然弟子無像通儒術著有聖門心學一卷
 益藩召住章山寺無名無來俱南城人為叢林推仰府志
 大成號竺菴七歲能詩初薙髮南嶽閉關十年禪理大悟即
 參博山又十年駐錫棲霞以文字名禪或一題數十篇或
 一篇數百韻金陵士大夫多重之聞壽昌火中夜披緇衣
 起慨然曰此我祖道場也可令心燈不續晨鐘暮鼓竟爾
 絕響乎遂草履跋涉至壽昌與鄧來沙募貲重建運甓踏
 泥聿新堂構著有會聖堂集指據錄及攝山南嶽諸藁同
 上

廣信府

漢

張道陵留侯八世孫太平廣記作留侯六世孫生於天目山學長生之術

章和二帝累召不起徧遊名山至興安雲錦溪升高而望

曰是有異境遂溯流之雲錦洞有仙巖焉止而煉丹三年

龍虎旋繞於上丹成餌之容貌益少又得祕書通神變化

驅除妖鬼年百二十於蜀之峰臺嶺昇天所有經籙符章

印劔以授子孫其四代曰盛復居此山歷朝重之今猶世

襲真人云安志道陵以蜀多名山攜家遊之以其地為二十

四化身居北平化而妻孫氏居陽平化後白日昇舉於雲

臺峰太平廣記

葛玄字孝先其先瑯琊人生於延禧四月八日八歲失怙能

自卓立十三通古今學嘗自念曰世有長生不死之道何不修之因遁跡靈嶽求異人入天台赤城上虞山遇真人左元授以九丹金液仙經煉氣保形之術行持三年化遯無方赤烏七年八月望日於葛仙山上昇凡修煉之地二十二處鉛山其一也今弋陽縣葛溪有葛仙塚舊志

晉

王表貴溪人元康初修煉於巖中久之太極真人降授以三五飛步之訣晉太和二年正月七日上昇香霧集空下聞仙樂丹井飛昇臺至今尚存世名其巖為王表巖安志

宋

呂生隱於丐或言海州人其來永豐甚久父老皆謂童稚識之莫記甲子顏貌如初一衲被體寒暑不易雖極污垢無

穢惡氣邑西有廢祠瓦蓋不完生席地而處數十年猶一日也祠壞乃止真隱觀人知之又止縣市道室中邑人蔡氏舍之荒園陳尚書天祐謫居於信禮謁之生遙見亟走林莽間解衣固辭贈千錢亦不受忽自書死日乃淳熙丙申一月癸卯也臨絕用薪燼書偈而死人以一席卷之埋於山下通判謝傑景撰傳生死後二年有蔡氏子押戍至汴既得批回日暮相遇道生平歡蔡以囊竭告生贈以草履令瞑目曰吾送汝歸漏三下遂抵家縣令異之發其冢見席化為畫酷肖呂形其草履化雙鶴飛去畫藏真隱觀太守金銳作圖記之建來鶴亭於原墓府志

詹大順字德常太霞宮道士劉正夫微時詹嘗為其先卜兆曰十八年後子孫當居宰輔及驗劉為上言之政和七年

西江志 卷一百四
詔赴闕固辭劉復裏糧促之乃赴召授沖虛法師視朝散大夫陽德觀住持凡五賜對重和元年授元素大夫請還山詔知鴻都觀建炎三年羽化壽八十五 安志

徐若渾字居明政和間上命林靈素講道寶籙宮士大夫咸會靈素蔓衍徐越次起曰傾河之辨必貴當於理終日不言亦貴會於道林曰子所學者何道徐曰孝於親忠於君居仁由義調喜怒正好惡安時處順樂天知命如是而已不知先生欲進以何道林高談曰此道乃教主道君之道子何以揚之徐進曰皇帝方以道蒞天下欲還萬姓之淳復一世之樸故俾先生以道開羣聽今叅侍講席貴賤大小咸願聞教未審先生以何道使仁者見其仁智者見其智賢者識其大不賢者識其小虛而往實而歸性與性俱

傳心與心皆得上異之宣問肯爲道士否徐對親老無兼侍乞歸山詔授將仕郎祠廟差遣終父喪不仕惟出入漁樵寓興詩酒隱玉虛之西嘗攜一布囊入市令羣兒探錢隨取隨有又嘗戲言欲入壁中已而果入壁不知所終 同上

王道堅貴溪人政和間赴闕延館於太乙宮徽宗訪以修煉之術奏曰清靜無爲軒黃所以致治多欲求仙漢武所以罔功修煉者非天子之事時徽宗豫知國當有厄命禳之對曰修德可以回天禳之說不敢誤國後歷請還山紹興初高宗復遣使召見先一日鳴鼓集大衆乃舉頌曰無心曾出岫倦翮早知還爲報長安使休尋海上山比敕使至已化矣 同上

祝永祐貴溪人與王太素齊名政和間號沖隱大師知本州
神仙宮時盜掠衢婺二州將及信境郡守請檄神兵備禦
祝曰公無憂盜踰常山當自退頃之盜至草萍大風晝晦
若有旌旛戈甲出沒山谷間乃宵遁郡守以聞加號通妙
後復徵之歎曰太素公將歸矣吾何往爲稱疾不赴卒年
九十一 同上

元

張留孫貴溪人少入龍虎山爲道士有相者曰神仙宰相也
世祖時從天師張宗演入朝世祖與語稱旨留侍闕下世
祖親祀幄殿風雨暴作留孫禱之立止授元教宗師居崇
真宮時天下大定因論至道清淨之旨深契上衷加號大
宗師武宗時爲大真人 安志

明

邵元節貴溪上清宮道士從其師范文泰李伯芳黃太初咸
盡其術寧王宸濠召之辭不往放浪江湖間嘉靖三年徵
入京見於便殿雨雪愆期禱有驗封真人統轄朝天顯靈
靈濟三宮總領道教錫金玉銀象印各一有事南郊命分
獻風雲雷雨壇賜紫衣玉帶敕建府於城西歲給祿百石
以校尉四十人供灑掃賜莊田三十頃蠲其租又遣中使
建道院於貴溪賜名仙源宮乞還山舟至潞河命中官迎
入賜蟒及闡教輔國玉印先是以皇嗣未建數命元節建
醮以夏言爲監禮使文武大臣日再上香越三年皇子疊
生帝大喜數加恩元節拜禮部尚書賜一品服無何死帝
爲出涕贈少師賜祭十壇遣中官錦衣護喪還有司營葬

用伯爵禮禮部擬謚榮靖不稱旨再擬文康帝遂兼用之
曰文康榮靖隆慶初削元節秩謚

明史藁

王德彰鉛山王直之胞弟幼慕神仙受月字星傳手掌文現
風雲雷雨四字祈禱無不應後坐化於禪靜院

府志

唐

慧覺大義禪師住鷺湖寺元和二年詔入麟德殿設齋召諸
大德論道帝臨聽論議有一法師問如何是四諦師云聖
上一帝三帝何在又問欲界無禪禪居色界此土憑何而
立師云法師只知欲界無禪不知禪界無欲法師云如何
是禪師以指點空法師無對復有數人致對者師皆乘機
為曉之帝問曰何者是佛性師曰不離陛下所問帝默契
由是益重禪宗師為衢州徐氏子嗣馬祖元和十三年正

月入寂敕謚慧覺禪師

傳燈錄

道和住貴溪天柱山章法院下初結草菴後代遂為精藍乾

寧中名西林院宋治平賜額

名勝志

智孚福州人始依講師後造雪峰既領心訣至鷺湖大張法

席為義存法嗣

景德傳燈錄

新羅僧新羅國人慕大義之風造焉至則已寂歎曰本為法
來師亡法亦何在遂投崖死數日後異香滿谷乳泉流出
其徒即之乃端坐崖下身體不傷懷中偈云三千里路禮
師顏師已歸真塢已關鬼神哭泣嗟無主空山只見水潺
潺遂固以香泥祠之大義傍建亭捨身崖畔曰臨深

安志

法政姓吳閩人壯歲為車盤舖卒以持誦作方便後為僧居
雲巖下有怪物若怒其來逞威欲齧之使去法政兀坐持

西江志 卷一百四
梵音晝夜不絕漸乃馴伏稍久遂與立誓分界而處焉翦
除蔽穢經營坐卧之所居十五年有施水活病之功臨化
徧辭檀越有頌同上

宋

德韶處州龍泉陳氏子母葉夢白光觸體覺而娠年十五有
梵僧拊其背曰塵中無置汝所也乃依龍歸寺剃髮十八
詣信州開元寺受滿分戒謁投子菴主不契造龍牙遁禪
師叅問猶惘然後於佛眼座下大悟開寶四年集衆告別
而化六祖下第十世指月錄

自清居信州大山寺性疎狂屢被師責一日謂師曰弟子欲
往京師見天子願假一乘師怒曰糞箕扛汝自清即成一
偈辭去忽一日乘傳歸奉敕重葺山門賜號雲風和尚豫

章書

慧日六祖下第十四世自機契雲居熟遊湘漢暨歸永豐或
處巖谷或居鄞市令鄉民稱丘師伯凡有問以莫曉答之
忽語人曰吾明日行脚去汝等可來相送於是贖路者畢
集師笑不已衆問其故即書偈擲筆而逝指月錄

明

無異諱大機舒城沙氏子母姚生師即不得食酒肉七月母
死他人婦乳之皆不食乃以榛栗飼不死年十六出家禮
五臺通法師修智者止觀之道嘗露坐松下者五年詣超
華受比丘律謁壽昌於鷲峰後居信州西巖四十餘日祖
印院七月乃遷博山禪律竝行閱三十年有星大如盤霄
萬丈鷗吻師中夜召首座智闇反覆宗乘相與大笑遂示

疾首座曰和尚去來自在云何師索筆大書歷歷分明四大字而逝

安志

智闇號雪關上饒傅崇儉子叅博山究船子藏身公案偶入槽廠見磨鼻拽脫有省呈偈於博山博山曰據子見地天下人把不住我却不肯點頭乃掩關謝客懸鏡反叅作雪關歌呈博山始可之後受瀛山請居無何博山遷化往來瀛博之間曹觀察請住鼓山再興湖墅佛事莊嚴師曰吾今可以謝喻彌陀矣至瀛山微笑而逝

同上

廣心號養菴上饒人姓鄭氏居家聞客談含生皆有佛信義言下洞然遂出世禮翠峰祝髮至焦山夜半聞江中櫂船聲豁然開悟乃謁華山真定定以雲門六不收公案驗之當下脫然定可之而示以偈歸信州住靈山中臺旋上峰

頂見大義舊址斬草重興師用無縫鎖一把挂法堂露柱上榜曰上古流傳鎖憑君智慧開若無開鎖法相見不須來壽八十一塏於本山唐帽峰

同上

國朝

覺浪名道盛別號浪丈人柘浦張氏子幼習舉業因大父坐亡疑此個靈明往何處去偶於街次聞猫墜聲有省後因瑞巖識公過浦遂密求薙棲夢華山後叅博山繼叅壽昌書林見東苑鏡一病瀕死苑調藥療之有間苑究其生平大驚曰吾壽昌這枝慧燈屬子矣因付源流順治乙未請住博山後至天界毘盧閣休夏忽命移錫禪堂停午書偈擲筆而逝有語錄著作五十二種

府志

粟如名弘瀚永豐余氏子年二十一棄家為僧師事博山礪

乙未浪丈人主博山目為法門聖箭已酉太守高夢說請
主席本山甲寅偽將汪文生事耿逆欲師易服從戎命偽
道金傳諭至山師作書却之云休心息念已三十年有蒙
存注強以攘臂豈仁人君子所為哉若為著袈裟壞法門
則雖節節支解決不肯也前於汪某致言即以一字絕之
今必來相勸勉則一鉢五湖何所非寓博山堂堂祖席一
任絕其爐煙鞠為茂草而已矣夫復何言耿得書遂止師
日見兵騎往來惟以慈心善口曉譬之靡不攝服信州士
民依山避難不下數萬皆得保全同上

紹燈名上明閩汀吳氏子少遵母雷氏命雪父讐後棄儒投
聖水華林省超和尚出家一日問曰某甲出世已遲天下
名山前哲開創已盡超曰猶有待者此去有座道場前後

四十里無人接待後詣雲居晦明受具復叅載一一日泊
舟常山定中聞異樂遙奏如遊白雲松塢之間黎明陸行
四十里至玉山界綠林澗而入見衆石奇勝宛如定中忽
憶華林之識遂訪業主姜陳二姓募其地建接待之所名
曰白雲再詣載一得授記荊康熙庚戌始開山焉四十年
九月索筆書偈坐逝有語錄詩集同上

饒州府

漢

吳丹酈邑人生時母為所苦投諸白水河三日不死復養之
因名白水十一歲母死居墓側五年哭聲振林木間後遊
浮羅青城諸山遇異人傳煉服術曹操召拜左奉駕郎不
就遊終南山得篆文十六字曰孝哉吳丹卓行異人以番

而鳳致道之所乃遊番至餘干吳鳳岡遂結茅居之舊餘
干習泰鄉齊梁間荆清溪觀相傳為白水真人修煉之所
名勝志

張徽安仁縣東五十步有山名張古山張為漢人學道於此
十餘年仙去有丹竈存楚東錄

六朝

葛洪號稚川咸和間王導辟為散騎常侍不就求為勾漏令
取丹砂修煉昇平間至鄱陽萬山中今之德興妙元觀也
見山川清奇委蛇環聚如龜鶴之形乃結寰鑿井煉丹嘗
自敘云戢勁翮於鸞鳳之羣藏逸足於跛騾之伍藜藿有
八珍之甘蓬華有藻枕之樂號抱朴子後不知所終舊志
著有內外篇碑誄詩賦檄章牋表神仙良史隱逸集異諸

傳經史百家方技雜事諸編金匱肘後諸方凡五六百卷

本傳年八十一兀然若睡而蛻樓觀傳

王遙字伯遼治人病但用八尺布帕敷地令瞑目坐上即愈
若有邪魅畫地為獄叩石呼之其物自斃嘗佩雌雄二劍
分陰陽日揮之時外境疫癘甚盛惟騰空噓氣指示方隅
遂止一竹篋長數尺未嘗開一夕大雨使弟子錢永以九
節杖擔之出衣皆不濕前有炬火引導登一小山入石室
中有謝稚堅繁陽子二人先在乃開篋出古竹簧三枚分
鼓之將別仍納篋中使擔之謝語遙曰卿無久住人間遙
曰早晚來也無何棄妻擔篋而去閱三十年有弟子見其
在馬跡山中煉丹元康二年暮春白日飛昇名勝志
東陽名曉遠婺州人稚川弟子從至番山中太和間召稚川

不赴乃令東陽朝見試以仙術因吐丹一顆金光眩目賜號明真先生又虞九霞青城人亦稚川弟子募建妙元觀賜號通神先生

府志

左燮建業清溪港人齊梁間慕吳鳳岡因徙居焉時人爲作道院曰清溪觀年百有八歲卒

安志

徐公逸其名修真於德興之雙溪龍潭側潭深莫測旁有巨石公嘗坐卧其上歷數十年貌不改妻亦如之一日忽辭衆同妻乘龍入潭歲旱遠近祈禱有蛇虺浮上請去輒雨投疏有誤字即泛出不納宣德間孫清簡需作詩投潭中曰塵世仙家兩隔離遙瞻白鶴舞東西月明瑤草光浮洞春暖桃花香滿溪兩字功名垂竹帛千年履跡印苔磯不知羽化何年代致使凡人心自迷少頃和詩浮出云五代

興亡正亂離新安一脈到江西家君樂道居汶水大叔傳芳住柏溪猶子宦情黃菊逕老夫垂釣綠楊磯自從背母朝元後春復秋還天地迷

同上

果仙久住饒衣帶皆綴雜果不停嚼人因號果仙城南杜君平鬻果每招與之不索值一日詣杜曰余有佳果幾樹足償君攜之行由芝山陰紆回四十餘里望見紅鮮滿野隔一澗峻深不可渡杜懼仙笑曰君無緣遂別而渡煙霞四生絕無人響杜循跡歸家已歷十餘年矣

同上

唐

鄭全福浮梁人幼不如葦文宗時入縣東三十里靈巖洞修煉後徙薄葉洞遊桃花溪見老人乘鐵船曰願借船還人間老人許之曰後三年當復來時已百餘歲語門人曰死

必葬我浮梁白水鄉及舉棺輕發之惟杖履存焉名勝志鄭

宋

張模字君範稱紫瓊真人兄根樸皆膺仕模獨恬退聞太虛真人寓安仁熙春宮往求道弗納及見模在市中施丐者數千文乃曰可教後會真州授以大道火候之祕遂隱去

安志

鄒希衍鄒源人出家元明觀天聖間遇吳人張台符授以丹術四十年不置枕席年九十卒辭曰戊亥重逢日乾坤透迴時幻身今已脫明日有丹梯後數年有道士寄書與冠服至元明觀謝之書曰客歲辱相過也其徒驚訝啓墓視之已尸解同上

趙子甄安仁人幼出家至道宮得九轉還丹之術壽九十餘卒葬沖虛山後三年有人遇於西蜀寄道友詩云秦川蟬蛻已三回明月清風任去來寄語沖虛諸道友芒鞋竹杖不須埋啓塚視之棺已空同上

汪一雷有道術邑人盧姓者捨宅為觀以居之臨化自題像云吾年七十七幾雨幾番風撒手清虛上一輪明月中有發其墓者中止一履其徒程洞清亦能呼風叱雨役使鬼神同上

連可久安仁人父鼈好結納道友可久幼時有熊曲肱者令作漁舟調調成目為神仙中人後居至道宮嗜酒能詩將化咬指在盤面書云立化也不好坐化也不好惟曲肱而枕之便是蓬萊三島書訖血蹟染穿盤下同上

萬直臣字道同號元隱不娶修真妙元觀觀有葛洪丹井紫
氣沖騰人以為毒不敢汲道同浚井見氣從砂顆中出即
取吞之後舉動異常一日水漲流大木於歲寒溪跳躍其
上隨洪濤去數年後兄信臣於無為州見之引入山中留
宿及別與一囊曰明年大歉此可濟一鄉持至樂平明溪
開視之糖也兄播於溪抵家告母母探囊底猶有存者視
之良金也復往索得金鄉人稱為淘金灘觀中道士病目
一日忽至為舐之光明如初留詩云往往來來數百秋幻
泡重作故人遊紫泥白雪尋常事何苦人間詠不休

類苑

仙史

元

趙緣督德興人宋宗室子稱緣督先生少習天官遁甲一日

於芝山酒肆逢修眉方瞳者索酒酣飲出丹書授之別去
問姓名曰我扶風石得之也自是遊東南海山註周易數
萬言傳文懿獨推許之嘗乘青驪往來饒信衢婺間旅費
自給所止多在隴丘宋濂劉基咸與之遊洪武初坐化葬
龍游雞鳴山後所著有仙佛同源金丹正理盟天錄諸篇
今所存者革象新書而已

名勝志

吳全節字成李安仁人年十三學道龍虎山至元中從張留
孫見世祖後成宗又召見授元教嗣師後進元教大宗師
元德真人雅好結士大夫推轂善類惟恐不盡至於賑貧
賙乏不以恩怨異卒年八十有二

明一統志

殷尚寶法名晁暘安仁人誠仙弟子能驅風致雨祈禱秘訣
遊錢塘吳山遇翠微真人授以紫瓊真人復本篇及丹訣

號上清紫暉散人生於至德丙午化於洪武甲戌有集虛
詞并詩文數十卷

府志

明

尹蓬頭自言曾見宋太祖入汴時嘗為神樂觀道士或雪中
流汗或大暑煨爐不可測事甚多正德末居鄱之晏公祠
有樊姬時餽禮之一日寢其樓樊僕入城南遇之見懷四
麪果分其一及歸尹卧方覺袖猶存麪果三焉鄱陽陳璜
官南部時約同官十餘輩試其異同日召齋俱至

安志

卓小仙蜀人善畫好吟詠舉止異常嘉靖中寓鄱士大夫喜
與之遊或納片石於口須臾成銀永豐王召小仙書其屏
曰披衣兼跣足開口笑王侯千年渾是醉一世不梳頭言
人禍福輒驗一日辰刻別眾後有遇之萬年城下者

府志

梁

晞明有戒行姓曹因稱曹禪師天監中自圭峰至黃檗結茅
山中山有塢石晞坐石上五十年歲旱一日山下老嫗哭
曰禾稿矣晞令嫗折樹枝插田中明日水滿由是乞雨者

日至

安志

唐

道明鄱陽人陳宣帝之裔也因有將軍之號少依五祖極意
研窮初無解悟及聞密付衣鉢與盧行者即率同志數十
人追至大庾嶺師最先見盧盧見師奔至即擲衣鉢於磐
石上曰任君將去師舉之如山不可動乃曰我來求法非
為衣也願行者開示盧曰不思善不思惡正恁麼時阿那
箇是明上坐本來面目師當下大悟禮謝回嶺獨往廬山

布水臺經三載後始往袁州蒙山大唱元化初名惠明以避六祖上字故更道明

安志

慈濟儀鳳間自閩中別師遠遊師告曰逢寶即住遇應即止至鄱陽寶應山因止焉往來於督軍湖嘗與虎偕行號伏虎禪師於湖北築舍為別院以居後不知所終

名勝志

蕘山和尚懷讓第四世大安法嗣僧問如何是西來意曰仲冬嚴寒問如何是丈六金身曰判官斷案相公改

景德傳

燈錄

西峰好吹鐵笛鄱陽妙果寺塏其高十七丈峰吹笛於塏尖風雨驟至行必與一烏犬俱一日至白湖山以錫杖插地俟犬遂成井號西峰井

名勝志

宋

用言和尚寶倫尊者竝天台山壽昌寺僧天聖二年至番永寧寺造石塏浚地下及三十餘尺築臺壘七層屹立三十丈及成出一藥方名脾積丸授寺僧曰其藥可留為塏中燈油費言訖去失其踪跡

同上

悟本江州人自雲門叅侍妙喜於時印可者多師私謂其棄已欲去妙喜語之曰汝但專意叅究有所得不待開口吾已識也後益銳志以狗子無佛性話一夕將三鼓倚殿柱昏寐間不覺無字出口吻頓悟後日妙喜歸自郡城師趨丈室未及吐辭妙喜曰這回方是徹頭也

安志

警良饒州吳氏子開法於越州福果衢州超化海會靈曜四

刹同上

佛印名了元字覺老浮梁林氏子幼稱神童長慕空宗遂薙

染初師寶積寺沙門日用試法華受具後遊廬山謁開先
暹遂嗣之住雲居四十年神宗賜高麗磨衲金鉢以旌師
德後於元符元年正月四日一笑而逝舊志年十七謁圓通
訥禪師訥以書記璉應詔以師補之二十八住江州承天
為開先嗣繼遷淮之斗方廬山之開先潤州之金山焦山
袁州之大仰廬山之歸宗續傳燈錄
嗣清安仁人幼出家貴溪松林寺有戒行孝宗召對賜號惠
禪師住持雲竇山名滿方外同上

元

可傳號正翁再興寺僧頎然而長犀骨突起聲出壓萬人博
覽儒釋諸書至元間遊廬山呂文煥延至其家同入京召
對問以佛法答以仁義治政之道世祖曰僧中龍也賜玉

環瓶鉢金帛住薦福再住雲居歸老妙果寺一日預與衆

訣趺化安志

紹睿餘干大慈寺僧號思庵嘗讀佛書人問之曰能言其心
又嘗讀儒書人問之曰能言其氣及長偈頌詩文援筆立
就延祐間隨師玉厓振至廬山吳澄見而異之後住南康

圓通同上

至仁字行中號熙怡鄱陽吳氏子年十八為徑山書記後住
紹興繼遷崇報工詩文虞集稱其文醇正雅簡有史筆宗
門之子長也從報恩寺真牧純公得度指空上人曰再世
天師也元叟曰仁書記虎而翼者也宋濂曰虎丘尊者名
澹居見性迥如牟尼珠臨終書偈而逝壽七十四稽古錄

明

西江志 卷一百四
太虛名紹郭樂平人通內典好吟詠縱遊三十年歸住永寧寺士大夫咸禮之素戒飲洪武辛巳壽八十三一日呼酒大酣取像題曰這箇老僧有甚把鼻醜貌稜增開眼嗑睡須知父母未生前本來面目在何處書已假寐而化安志杞楚材名似杞博覽儒書好吟詠洪武間赴召回居鄱之永福寺不疾而化著有瞻雲集若干卷宋濂為序府志

西江志卷第一百四

西江志卷第一百五

仙釋三

南康府

唐虞

錢鏗顓頊元孫因進雉羹於堯堯封於彭城謂之彭祖又云彭鏗曾過彭蠡之濱造其名嶽今廬山是也徧遊洞府以窺聖迹已而把釣於臺上雙鯉化為雙龍冲天而去廬山名賢傳

漢

蘇耽吳時道士居都昌縣西四十里元辰山煉丹上有鞞迹源馬蹄洞丹竈石臼名勝志

六朝

文慧通女真也修真於府城南三十里黃龍山一日跨黃龍
昇仙而去 安志

陸修靜吳興人劉宋時居廬山簡寂觀有道術文帝慕之製
停霞寶輦賜焉明帝設崇虛觀通仙堂以待之至即求歸
不許遂卒於京賜謚簡寂先生赴召時挾布囊出逝之日
布囊還懸廬山舊居巖樹上 名勝志 觀有竹相傳修靜手種

出笋苦而味能甜語云簡寂觀中甜苦笋歸宗寺裏淡鹹
齏 夢溪筆談 廬山東林寺臨溪遠公送客過此輒有虎號因名

虎溪後送客未嘗過此獨淵明與修靜至語道契合不覺
過溪相與大笑世傳為三笑圖 雲笈七籤

葉千韶字魯聽建昌人少隱廬山辟穀服氣常獨居忽有白
衣人言君道德臻備仙籍褒昇當在人間役使鬼神其後

能致風雨救人疾疫其應如響 安志

唐

劉混成字元和其先彭城人居白鶴山久之留弟子何玉守
舍自入五老峰石室種木瓜為食丹成年八十六而逝舉
棺將葬空無人矣所居有丹井藥臼 同上

黃洞源桃源洞人有道術時號三洞法師建元中入廬山紫
霄峰下得石壇築菴居之 同上

李道沖潯陽人不如葷酒結廬紫霄峰講說莊老忽語人吾
欲遠遊且不返衆未悟競沮留之及午而逝 府志

丁元真字仲誠潯陽人得道能役鬼神嘗遊康王谷谷有王
莽時銅馬久而為妖土人廟祀之其妖愈熾元真以三洞
法徙其廟於澗西妖遂息 安志

熊德融字太光荊州人訪道至九嶷山遇異人遂隱廬山咸通二年逝同上

五代

許堅字介石又號布衣道者唐末居簡寂觀得大魚即全體烹而啗之後卒於金陵至景德中陳靖遊廬山堅出謁於洪井山談甚洽及靖還金陵乃知其死已久安志

楊保宗及笄許聘忽有悟入廬山崇善觀為女道士南唐元宗聞之詔赴闕引見諸嬪御競施服玩金珠綵繡數逾千萬詔新其字尚書郎韓熙載撰記賜額曰真風觀詔臣下作詩送之既歿舉棺甚輕蓋尸解云府志

譚紫霄泉州人有道術事閩王昶封正一先生閩亡隱廬山棲隱洞南唐後主召至金陵賜號金門羽客并金紫不受

開寶六年卒著化書行於世

明一統志

宋

陳搏字圖南號希夷亳州人嘗遊白鶴簡寂受易經心法於

廬山異人或曰異人即許堅也安志

劉得本字孝叔郢州人至五老峰遇異人引入山中還舊所後遂不知所處同上

洪志不知何許人通經史醫算為道士隱廬山常騎青牛因號青牛道士遇異人授以方術同上

明

周顛仙建昌縣人幼患癩疾行乞南昌市中因號周顛每遇太祖出輒擁馬首呼曰告太平一日命衛士覆以甕積薪煨之火息啓視危坐宴然乃命居蔣山寺半月不食寺僧

以為言太祖召之步趨若平時時友諒圍南昌太祖復征之顛從行見江豚吹浪曰水怪出損人多太祖怒命投顛江中久之復與眾俱來頻擲水水不能溺太祖更與同食食畢別去壬申太祖患熱症療治弗效俄而赤脚僧詣闕言周顛及天眼尊者遣進藥服之果愈復遣行人往廬山踪跡之顛引行人入見宮室羅列凡二十有八曰適所至乃二十八宿出治之所婁宿今處世間治天下行人曰何以使上見信乃賦詩封固以獻啓之其語不可解久之為立祠廬山御製周顛仙碑記碑在天池東北昇仙臺中書舍人詹希原奉敕書丹篆額

豫章書

按明史周顛傳失載進藥及遣行人踪跡兩事故從豫章書

徐道人即天池所祀四仙之一也嘗修煉於登雲寺安志
周休休正德間寓隆道觀因觀主為糧繫獄出橐中藥如黍粒點銅十餘金助之自是絕跡同上

唐

智常馬祖法嗣也目有重瞳以藥手按摩致目皆俱赤號赤眼歸宗焉後示滅敕謚至真禪師

景德傳燈錄

道膺幽州玉田王氏子住雲居寺嗣洞山价嘗叅洞山結茅於三峰經旬不赴堂山問其故膺曰每日有天神送食山曰將謂汝是箇人猶作這箇見解汝晚間來晚至山曰不思善不思惡是甚麼膺回菴寂然晏坐天神自此不見如是三日乃絕天復二年示寂謚弘覺禪師塏曰圓寂

錄

傳燈

寰中住安義開陽禪院僖宗賜號性空

安志

道簡范陽人初造雲居謁膺公膺公大奇之令刻苦事衆於

是徧掌寺務不妨商略古今以臘高居第一座膺將順寂

主事問嗣者曰堂中簡主事與衆屬意在第二座而姑請

師意師必辭也師既受記剝即攝衆演法主事大沮師知

之一夕遯去有安樂樹神號泣詰旦衆追至麥莊悔而迎

歸聞空中連聲唱曰和尚來也壽八十餘示滅後廬州帥

張崇施財建石塔於本山

指月錄

懷祐泉州仙遊人受業於九座山陳禪師尋叅石霜初居謝

山復遷棲賢終於廬山謚玄悟大師塔曰傳燈

傳燈錄

宋

道詮安福劉氏子青原下八世慧輪嗣也髻亂禮本州思和

尚聞慧輪化被長沙時馬氏僭竊師冒險遠叅後輪歸寂

乃回廬山於牛首峰下結茅爲室開寶五年洪帥林仁肇

請居九峰尋屬江南國絕僧徒例試經業師之徒衆竝習

禪觀乃述一偈聞於州牧牧閱之與僚佐議曰旃檀林中

必無雜樹惟師一院特奏免太平興國間知南康軍張南

金迎住歸宗雍熙二年趺坐白衆而寂

傳燈錄

圓智嗣長慶稜姑蘇人江南李中主煜捨宅爲開先寺太平

興國二年延智說法爲開先第一代

同上

善暹臨江人雲門三世嗣德山遠羣稱海上橫行暹道者

同上

正賢歸宗禪師也習經論過目成誦義亦頓曉大慈秀稱爲

經藏子後叩法眼一日入室

指月錄

可宣漢州人依瑯琊一語頓契後住歸宗時郭功甫任南昌尉相與甚厚而為郡守所摺寄書功甫曰某世緣尚有六年奈州主抑逼當托生公家功甫閱書驚喜中夜其妻夢師入其寢失聲曰此不是和尚來處功甫問之以夢告功甫取書以示果孕及生名曰宣老期年記問如昔三歲白雲端過功甫始見即曰吾姪來也雲曰相別幾年曰四年雲曰甚處曰白蓮莊上雲曰何以為驗曰爹爹媽媽明日請和尚齋果六周無疾而卒 指月錄

志芝菴主嗣黃龍南嘗結茅廬頂曰千峰頂上一間屋老僧半間雲半間昨夜雲從風雨去到頭不似老僧閒 安志

明

雪嶠圓信臨濟三十世嗣龍門傳崇禎壬午司李黃端伯請

住開先有古鐘啞折信至復鳴 廬山志

觀行號顓愚霸州人崇禎間由五臺住雲居著有金剛楞嚴四依解後遊金陵遷化還葬雲居 安志

天隱住廬山常抱疾有詩曰雨餘白石氣如炊濃綠陰中霽景遲經月未行菴下路樹禽引子去多時王偉守南康請住兜率寺即他徙 九江志

國朝

戒顯號晦山臨濟三十二世姓王氏太倉人元名瀚少補弟子員崇禎末棄家參具德悟宗旨開法雲居遷靈隱而寂仍捨雲居 安志

天然函昞番禺曾氏子明崇禎癸酉舉人公車過廬山參空隱獨契旨已卯冬落髮於歸宗明年入羅浮遷雷峰

西江志 卷一百五 六
國朝順治癸巳復入匡廬領棲賢院戊戌復還雷峰繼主華
首海幢芥菴丹霞諸刹辛亥秋太守廖文英仍請住持歸
宗府志

今釋字澹歸杭州人姓金名堡明崇禎庚辰進士入

國朝為僧受天然記剝開丹霞於粵東旋歸廬山淨成精舍

後示寂當湖其徒奉靈骨葬廬山天公衣鉢塏之旁粵東

僧眾復移塏於丹霞之海螺峰著有徧行堂集廬山志

九江府

周

匡俗字子孝

豫章記作匡續一名匡裕字君平

一曰子希師老聃得久視之

道結茅虎溪修煉七百年定王問太史伯陽神仙之在世

者伯陽舉五嶽諸仙以對先生其一也因召之不應又二

百年威烈王以安車迎之使未至先二日白日輕舉使者

至惟得其草廬焉人因呼為匡山又曰匡阜潯陽記兄弟七

人皆有道術漢武元封五年南巡射蛟潯陽封為南極大

明公稱廬君有廣福觀安志云謝灝有廣福觀碑以專祀先生者在香

谷西一里許寰宇記

按惠遠記俗生殷周之際結廬山上因名廬山而通志

謂俗父平野王當秦末同吳芮佐漢定天下而亡封俗

於潯陽及武帝南巡封太極大明公竟以為漢人不知

何所本也

漢

劉越嘗邀康阜過其所居云山陰有石高三尺吾宅也扣之

即見我焉如其言往叩之果有二童子引見越越冠玄玉

冠朱紱劔佩飲阜以玉酒三爵延生湯一啜阜心知其異欲留居之未出口越曰子姑去他日來居未晚也乃出石在太平宮殿堦下因號其石曰劉越洞天今不知所在或曰康阜即匡俗也 廬山志

王長趙昇九徵志云王趙二真人理第六十九福地廬山天師告諸弟子曰爾等俗態未除其九鼎之要惟付王長也趙昇求為弟子天師以七事試之遂得入室後與王長同昇太乙天中 仙苑編珠注

王喬漢葉縣令隱於德安崑崙山巔朝斗丹成仙去遺有石焉觀後有月窟東西二湖大紅牡丹花至今尚存云是喬手植 林志 喬河東人也顯宗時為葉令有神術每月朔望常自縣詣朝端帝怪其來數而不見車乘令太史伺望之言

其臨至則有雙鳧從東南飛來於是候鳧至舉羅張之但得雙鳧則四年中所賜尚書履也後天下玉棺沐浴寢其中葬城東土自成墳 後漢書

九仙不知何許人兄弟九人寓德安博陽山之巔丹成同日昇舉今所居處名九仙臺 安志

劉德本鄂州人避亂廬山見鹿裘道者與行至五老峰下深澗中有大石門正闢一老人扶策倚門立見德本即邀與俱入乃大石洞也洞中别有天地風日和煦花樹芳蔚負異人境行二里有大宮殿金碧煥爛呵衛嚴整榜曰紫元景曜之門老人曰此九天使者所治也德本欲求見使者老人曰不可因復出門逡巡失老人及道者所在 同上

劉綱漢時仙官謫居蓮花峰下奉章上帝救德化縣令張某

西江志 卷一百五
之死又云上虞縣令也與妻樊夫人俱得道術二人俱坐
牀上網作火燒屋從東邊起夫人作雨從西邊上火滅仙苑編珠注

度索君真仙也昔有人見一白布單衣者高冠冠似魚頭度
索君曰昔廬山共食白李未久三千年日月易得使人悵
然去後度索君曰此南海君也安志

李鎮居雞籠山山上有石雞冠距如生鎮常玩之一日雞忽
無故自毀裂鎮曰雞既如此吾何以全果卒同上

六朝

楊羲修真得道與紫薇夫人諸仙遊諸仙各授學道口訣并
說羣仙事跡楊錄其書司馬朗得之嘗有雷電光怪陸修
靜又得之遂隱廬山安志

董奉字君異閩之候官人居廬山為人治病不取錢重病愈
者使栽杏五輕者一數年計得十餘萬株後杏大熟作一
草倉於林榜示人曰欲買杏者不須報奉但將穀一器易
杏一器有置穀少而取杏多者有虎輒吼而逐之奉得穀
盡以散貧者歲大旱縣令丁士彥齋酒脯請禱奉曰貧道
屋皆見天恐雨至何堪令曰先生但致雨當為架屋明日
令人吏運竹木起屋立成聚土作泥擬數里取水奉曰不
須爾暮當大雨暮果然令女為邪所魅投奉治之曰若得
愈當以侍中櫛奉然之忽一鼉陸行詣病者門使斬之遂
愈納為妻奉每出妻不能獨居乃乞一女養之年十餘歲
奉一旦竦身入雲中去妻與女賣杏取給奉在人間三百
餘年顏狀如三十時人神仙傳

張施深棲隱谷中學老子術梁武帝聞而嘉之詔以其閭爲
康王觀後據斬絕前俯泓渟神龍弄珠光照紺髮周景式
記

蔚煉師名文光大同中修真得道白日昇舉人皆見之今龍
山丹竈松壇石室遺跡尚存彭澤縣志

唐

郝法遵簡寂觀道士道行精確獨力檢校已歷數年忽夢元
中法師謂之曰汝無人力甚見勤勞今有二童子所恨年
小耳既覺出山過王某家有孩子年方一晬見法遵抱其
足不肯捨遵去晝夜啼號遵復至則欣然後數年父母即
捨爲童子又一小兒姓劉眼有五色光父母疑其怪異因
灸眼尾其光遂絕已四五歲亦捨在觀中相次入道果符

元中夢授之語安志

薛肇不知何許人與崔宇讀書廬山宇尋擢第授東畿尉經
三鄉驛忽逢肇叙舊薛曰貧居不遠能左顧否宇從之初
入一小徑甚荒涼更三里間殿閣森沈薛先入有數十人
擁接升殿乃召崔開筵女樂四十餘輩見一女彈箜篌上
有十字天際識歸舟雲中辨江樹崔默記之薛問中有所
悅否以箜篌者對薛曰他日與君及明送之官路別去崔
至官求婚得柳氏女嘗疑曾識而不記其處命取箜篌理
曲見十字詩在焉問其故云其時染疾夢中見一使人追
云西城大仙陳溪薛君有客五百里內解音聲處女盡追
可四十餘人即隨去遙見薛與崔少府在殿同飲覺來疾
已除却各話其事方知薛君已仙神仙傳

蔡尋真李騰空蔡爲侍郎蔡某女李爲宰相林甫女貞元中
同入廬山蔡居詠真洞天九疊屏南李居九疊屏北凌雲
峰下竝以丹藥符籙救人疾苦三元八節會於詠真洞講
道九江守許渾以狀聞昭德皇后賜金帛闢土田已而蛻
去門人收簪簡瘞於舊居鄉俗歲時祀之後昭德崩許渾
入朝因請賜觀額詔以詠真觀爲尋真觀騰空所居爲昭
德觀

豫章書

茅安道廬山道士曾授二弟子以隱形洞視之術曰資爾學
道即不得盜情而銜其術也苟違吾教能令術窮二子至
潤州謁韓晉公湜弛慢縱誕韓大怒縛之二子行其術果
不驗韓詰問術師姓名而安道已在門矣龐眉美髯韓不
覺離席迎之安道曰二子愚騃干冒尊嚴請詰而愧之然

後行刑韓致二子堦下械繫甚堅安道就取硯水嚙之二

子化爲雙黑鼠自變巨鳶攫二子冲飛而去

安志

崔道人久居廬山積香數斛一日盡發命弟子至五老峰下

徐焚之默坐其傍煙甚不相辨忽躍起已在峰頂上

同上

宋

劉伯五宋時人修真於浩山山有煉丹井昇仙臺

彭澤縣志

黃知微字明道江州人得道佯狂人謂之黃風子一衲百結

寒暑弗易行嘗攜兩囊隨所得雜投其中而不臭名曰錦

香又善噫氣輒經時不絕響徹雲漢素不攻詩而多佳句

如溪雲拂地送殘雨谷鳥向人啼落花萬里碧雲開幕色

一條銀漢在天涯之類皆可諷詠死瘞宮側後從蜀寄書

山中開函皆喪亂後道士姓名也

安志

西江志 卷一百五
劉虛谷著丹還篇能以智慧性斷煩惱根乃至有無通用之
秘朱子嘗與談易論還丹之旨後月夜登青牛洞絕頂端
坐而逝 同上

胡用琮太平宮道士遇道流於雲堂留之飲既醉道流以刀
剡土瀝酒漱津和之成墨以授用琮投之几上鏗然有聲
翼日視之紫磨金也其所剡土處有泉出焉甘而不竭故
謂其堂曰授墨堂泉曰墨仙泉用琮初以墨磨酒飲其半
宿疾頓愈由是厭人間事學道年七十顏如童子 同上

皇甫坦字履道臨淄人入蜀居峩峩山嘗暮行風雪中聞有
呼之者顧見一道人臥小菴中因留與抵足眠比曉道人
告曰他日可訪我於靈泉觀後訪之乃妙通真人朱桃椎
也盡得其秘顯仁太后患目翳召見慈寧殿坦為噓呵布

氣即翳脫瞭然又詔療仙韶甄孃嬖亦即愈辭還山兩宮
賜賚皆極厚不受復召入賜紫衣絲履御書黃庭道德陰
符等經詔築室廬阜兩宮賜金為費不受又賜御書清虛
菴額詔繪像御贊之內禪後召見康壽殿賜沈香二百兩
御畫芝草扇御書贊乾道改元賜御書靈寶經壽聖皇后
所書清淨經三年奉詔禱青城還山屢詔不起淳熙五年
九月坐逝 豫章書

白玉蟾瓊州人

續文獻通考云
福閩清人也

姓葛名長庚嘗任俠殺人亡

命之武彞事陳泥丸為道士自稱靈霍童景洞天羽人善
幻好詭誕之行往來廬山間山南北諸佳勝竝有題詠而
太平宮為多紹定己未冬解化賜號養素真人 安志

楊權字正夫盱江人自少穎悟不羣聞張真牧有道行往從

西江志 卷一百五
之授以九返之術後舟次九江泥沱嘴遂結茅修煉其中
時大疫施以符水輒效嘉熙四年語其徒曰吾今歸矣乃
留偈曰七十九年夢覺五湖四海隨緣撥轉雲頭歸去曉
日東生亦然危坐而逝咸淳中封通慧孚惠真人祠在九
江名壽聖觀 豫章書

元

李武歛縣人遊江湖遇人授以仙術施藥愈病屢驅旱魃後
於邑之鳳山嶺結茅為廬精修數年道成一日於酷暑暴
卒曝屍日中旬餘不朽牧童異之投以石礫輒有銅錢觸
石而返於是羣兒競投以石大者得金小者得錢石聚成
塚金錢遂絕後有見其在逍遙山者啓視其塚衣履存焉
里人益異建廟塚傍祈禱大驗號為真仙 湖口縣志

洪真人鄱陽人洪皓之後元末至彭澤縣南嶺結菴講說莊
老及修煉之法或驅雷致雨以濟歲旱不數年坐化自令
以缸覆屍三日視之惟冠服劍履存焉鄉人立廟祀之 安志

明

孫化南不知何許人天啓間愛廬山詠真洞幽秀作墓園其
側垂成投身以入而封之留一竇劣通清濁朝夕誦皇經
禮北斗其術以清淨自然為宗坐圜三載一夕吐三昧火
鬚眉皆焦遂蛻去 同上

六朝

慧遠姓賈氏雁門樓煩人年十三依舅令狐通六經尤善莊
老二十一聞沙門道安講般若經豁然開悟遂與弟慧持

西江志 卷一百五
投簪受業沙門曇翼每給燈燭之費太元六年立精舍於廬山以去水猶遠舉杖插地泉湧時亢旱於池側誦海龍王經有神蛇浮水俄大雨因名龍泉精舍永師謂刺史桓伊曰遠公方當弘道而貧道所居隘不可處其夕大雨雷震詰旦林麓廣闢素沙布地榎楠文梓充布上下不知所自至伊乃爲建刹名其殿曰神運以在永師舍東號東林復製五銘刻於石先是陶侃刺廣州時漁人於海中得金像文殊及移督江州迎像還潯陽舟近而溺師禱之忽浮出迎至神運殿造重閣以奉之製讚曰諸教三昧其名甚衆功高易進念佛爲先旣而不期而至者道生等十八人結社念佛復率衆百二十三人同修淨土之業造西方三聖像建齋立誓令劉遺民著發願文王喬之等爲念佛三

昧詩以見志居山三十年跡不入俗義熙十二年七月晦夕方從定起見阿彌陀佛告曰汝七日後當生我國即寢疾製遺誠令露骸松林之下即嶺爲墳八月六日順寂弟子不忍露屍與太守陶侃奉全體葬於西嶺素石爲塏謝靈運作碑以銘遺德張野作序自稱門人宗炳復立碑於寺門以表德業所著有法性論十四篇不敬王者論五篇經論諸序銘贊詩記凡十卷號廬山集唐大中二年追謚辨覺大師南唐昇元三年追謚正覺宋太平興國追謚圓悟大師凝寂之塏蓮社十八高賢傳

慧永西林法師也河內繁氏子年十二出家師竺曇現初習禪於恒山與遠公同依安法師太元初至潯陽刺史陶範捨宅爲西林以奉師師於峰頂又別立茅室至其室者嘗

西江志 卷一百五
聞異香因號香谷一虎同居人至輒驅去及遠公來龍泉
分居東西二林影不出山者三十年何無忌鎮潯陽至虎
溪請遠公及師遠公持名望從徒百餘高言華論舉指可
觀師衲衣半脛荷錫捉鉢松下飄然而至何謂衆曰永公
清散之風乃多於遠師也義熙十年在疾忽斂衣求屍曰
佛來也言終而化異香七日方散年八十三葬於寺之西
南唐玄宗詔重建塏亭追謚覺寂大師實智之塏同上
慧持遠公同母弟也幼讀書一日所紀常敵十日年十八與
兄同事道安止廬山師身長八尺衲衣垂膝徒屬三百師
爲上首瑯琊王珣以書問寧遠持二公孰愈寧曰誠謂賢
兄賢弟珣復書曰但令如弟仍未之有况復賢耶隆安三
年辭兄入蜀遠曰人生愛聚汝獨樂離師曰滯情愛聚者

本不應出家今旣割欲求道正以西方爲期耳至成都郫
縣龍淵寺大弘佛法升其堂者號登龍門義熙八年順寂
春秋七十六臨終以東間經籍付道弘西間法典付曇蘭
蓮社高賢傳義熙壬子垂誠門徒遂入定於龍淵龕樹至政和
三年風折其樹持乃出定徽宗有像贊三首稽古錄

道生魏氏鉅鹿人幼從竺法汰出家年在志學便登講座初
依廬山後與僧叡慧嚴慧觀等從羅什受業關中乃立善
不受報及頓悟成佛義又著二諦論佛性常有論佛無淨
土論應有緣論又以法顯三藏所翻泥洹經先至經云除
一闡提皆有佛性謂是經來未盡耳乃唱闡提之人皆得
成佛僧黨以爲背經遂擯而遣之師正容誓曰若所說背
經當見身厲疾若與實相不背願舍壽之日據獅子座及

後大經至諸師皆媿服被擯入虎丘山聚石為徒講涅槃經石皆為點頭旬日學眾雲集師於寺請罽賓律師譯沙彌塞律傳於世復投廬山預蓮社久之還都止青霞寺時王弘范泰顏延之相從問道元嘉十一年於廬山升座說法將畢眾見塵尾紛然墜地隱几而化宛若入定諸師聞之益信前誓有證翌日葬於廬山西阜同上

曇順黃龍人幼出家承訓羅什講釋羣經妙盡色空無著之旨什歎曰此子奇器也後來廬山同修淨業寧蠻校尉劉遵孝於江陵立寺要師經始盛弘念佛三昧之道元嘉二年別眾坐逝異香滿室春秋七十九同上

僧叡冀州人遊學諸方行經蜀西界為人所掠使牧羊有商客異之疑是沙門及問以經義無不綜達即出金贖之後

至關中從羅什諮稟經義久之入廬山依遠公修淨業既而適京師烏衣寺講說眾經宋彭城王義康要入第受戒師曰禮聞來學王乃入寺祇奉戒法謝靈運篤好佛理嘗以經中字音求證於師因為著十四音訓梵漢昭然元嘉十六年無疾告眾曰吾將行矣面西合掌而化眾見臥內一金蓮花倏爾而隱春秋八十五同上

曇恒河東人童儒依遠公出家年十三便能講說內外典籍無不通貫德行清孤物情推服嘗有犀鹿馴遶座隅自入廬山專志淨業義熙十四年端坐合掌厲聲念佛而化春秋七十二同上

道昞潁川人陳氏幼出家為遠公弟子該通經律兼明莊老志節孤峻言與行合念佛三昧究心無間義熙十四年豫

西江志 卷一百五
章太守王虔入山謁敬請為山中主用紹遠公之席眾以道源法嗣咸知宗仰元嘉十三年集眾念佛就席而化春秋七十一 同上

曇詵廣陵人幼從遠公出家勤修淨業兼善講說註維摩經行於世嘗著窮通論以明宿修述蓮社錄以記往生又能別識鳥獸毛色俊鈍之性洞曉草木枝幹甘苦之味妙盡其理人知其有密證云元嘉十七年集眾謂曰自建寺以來至此五十年吾之西行最在其後即跣趺念佛百聲閉息遂絕春秋八十 同上

道敬瑯琊王氏祖凝之刺江州遂從遠公出家年十七博通經論日記萬言每歎戒律終身難全願淨六根但稟一戒以為得度之要遠公知其堅正許之篤志念佛早夜弗替

遠歸寂乃入若邪山宋永初元年謂眾曰先師見命吾其行矣即端坐唱佛而化眾見光明滿室彌時方滅春秋五十二 同上

佛馱耶舍罽賓國婆羅門種有沙門至其家乞食父怒毆之遂手足攣蹙巫師謂坐犯聖賢即請沙門悔過旬日乃瘳因令耶舍出家年十五誦經日至萬言以分衛廢業為憂一羅漢代其乞食年三十復從舅氏學五明論世間術至沙勒國而羅什至乃從學阿毘曇論十誦律後入長安姚主別立省寺於逍遙園四事供養一無所受時至分衛一食而已時什譯出十住經師更相徵決辭理方定師髯赤善解毘婆沙論時號赤髯論主秦弘始中譯出四分律長阿含經義熙八年來廬山入社復還本國以虛空藏經一

卷寄商客至涼州蓮社高賢傳耶舍躬自負鐵於紫霄峰頂鑄

佛馱跋陀羅姓釋迦迦維羅衛國人甘露飯王苗裔也幼亡

父母出家年十六博學羣經深達禪律與迦達多遊屬賓

時姚秦沙門至屬賓覩法眾清淨慨然東顧曰孰能遂我

祈請化流東土僉應之曰跋陀羅其人也慧嚴乃邀師同

行從鳩摩羅什於長安秦太子泓請師於東宮集眾說法

忽謂弟子曰吾見本國五船俱發眾謂妄言因擯之與弟

子慧嚴慧觀四十餘人至廬山香谷遠公請師於東林譯

出禪教諸經後西適江陵果見天竺五舶至及還都立道

場寺吳郡內史孟顛右衛將軍褚叔度請師主譯華嚴梵

本法業慧義慧嚴慧觀等為筆授成六十卷有二青衣日

從池出灑掃研墨師先後譯出觀佛三昧經泥洹經修行

方便論及法顯所得大僧祇律凡十五部宋元嘉六年念

佛而化塏於廬山北嶺蓮社高賢傳

龍眠李伯時曰十八賢傳始不著作者名疑自昔出於廬

山耳熙寧間嘉禾賢良陳令舉舜俞粗加刊正大觀初沙

門懷悟以事迹疎略復為詳補今歷考廬山集高僧傳及

晉宋史依悟本再為補治一字不遺自此可謂定本矣

按十八賢自慧遠至佛馱跋陀羅外周續之張野張詮

雷次宗已見人物劉澄之宗炳見寓賢

曇翼餘杭人初入廬山依遠公後往關中見羅什還會稽入

秦望山誦法華經十二年感普賢大士化女子身特來相

試郡守孟顛聞於朝敕建法華寺俗姓王七歲出家以掖

有雉毳因名以翼

東林寺志

曇邕姓楊關中人形長八尺雄武過人來廬山師遠公內外典籍無不綜習立茅屋於山西以自居弟子曇果一夕夢山神求受戒法果曰家師在此可往求之邕忽見一人著袷衣風神端雅從者三十人乞受戒師為說法授五戒畢神以外國二鋤為颯而去後往荊州行化卒於竹林寺初仕苻秦為衛將軍堅南敗遂從道安出家次事遠公

稽古錄

僧濟入廬山精悟深要遠公歎曰紹隆大法其在汝乎及在疾遠公以燭遺之曰汝可憑此建心安養師執燭停想延僧誦淨土經至五更以燭授弟子元弼隨僧行道頃之覺自乘一燭浮空而行見阿彌陀佛接至於掌徧事諸佛明

日謂弼曰佛來也即舉首西顧一息而終時方炎歆體三

日不變異香郁然

東林寺志

慧恭豫章豐城人與僧光慧堪慧蘭同志為學光等學力不逮恭而於淨土則繫想過之蘭謂恭曰君雖力學博聞豈不知經云如響奏音樂悅彼不自聞恭曰學不可已孰能未死昧昧如癡哉後七年蘭等先逝去又五年恭病且篤曰大道沿洄何時可止死生去來吾何歸哉於是叩頭雨泣誓安心養念不少間忽見無量壽佛以金臺前迎恭乘其上見蘭等於臺上光明中而告之曰長老受生已居上品但恨五濁淹留相依之晚耳乃於是日欣然奮迅告眾而滅義熙十一年也

同上

法安遠公弟子妙善講說兼習禪業律身持戒為行尤精義

熙中新陽邑社有暴虎居神廟樹下害民以百數安乃止
 樹下禪坐須臾虎負人至見安驚喜安乃為說法授戒而
 去明旦居民見安謂是神人因改神廟立寺請居之左右
 田園竝捨為寺業嘗欲畫像須銅青慮不可致忽夢一人
 跪牀前云此下有銅鐘寤即掘之果得二鐘取青成像而
 以銅助遠公鑄佛後不知所終同上

闕公則入廬山白蓮社既逝有同社人於洛陽白馬寺為公
 則修忌祭忽一時林木殿宇皆作金色空中有聲曰我是
 闕公則祈生極樂國今已得生矣言訖無所見同上

辟蛇行者不知所自來事遠公善驅蛇因號辟蛇行者遠公傳

伽提婆姓瞿曇罽賓人遠法師翹懃妙典虛心側席請入廬

山提婆乃於般若臺手執梵文口宣晉語去華存實務本
 盡義今之所傳蓋其文也安志

景超素持戒範若護浮囊性惟矢直言不面從至廬阜便有
 息意嘗禮華嚴一字拜之計拜已二遍乃燒一指為燈供
 養慶禮經周次禮法華經同前身膚內隱隱出舍利磊落
 圓瑩或有求者坐席行地捨之無算同上

慧安學通經義以專戒見稱誦經三十餘萬言止廬山凌雲
 寺學徒雲集常捉一杖云是西域僧所施光色炯徹頗有
 香氣上有梵書莫能識後入關羅什見之大驚曰此杖乃
 在此間耶因譯其字安以杖贈外國僧波沙那那賚還西
 域宋元嘉中卒於山寺同上

慧慶廣陵人出家止廬山寺有戒行誦法華十地思益維摩

每夜吟諷暗中輒有彈指贊歎之聲嘗於小雷遇風波船將覆慶惟誦經不輟覺浪中有人牽之倏忽至岸於是篤勵彌勤宋元嘉末卒春秋六十二同上

僧瑜姓周餘杭人元嘉中與同學曇温慧光等於廬山共建精舍名曰招隱瑜嘗以為結累三塗情形故也情將盡矣形亦宜捐孝建二年集薪為龕是日密雨乃誓曰所志克明天當清朗言已雲景明霽便入薪龕中誦藥王品火燄交至猶合掌不散後旬有四日瑜房中生雙桐根識者以為婆羅寶樹因號雙桐沙門同上

道珍梁初住廬山夢有人乘船向阿彌陀國珍欲隨去船人云未作淨土業謂須經營浴室并誦阿彌陀經既覺即如夢所作久之于房中山池降白銀臺珍記其事置經函中

及卒之夕半山已上如列數千炬火近村人悉見之旦就山尋訪乃云珍卒後因檢經中始知往生事續高僧傳

法歸廬山峰頂寺僧也本住襄陽漢陰偶夢有神期往廬山遊歷既覺尋夢而往至廬山樹石寺塙宛如前夢依而結宇晨夕繼業遂終山舍同上

慧景清卓出類不交道俗及卒後乃返握兩指人有捋者雖伸還屈卒之晨山峰松樹竝兩甘露今名甘露峰是也府志

道融梁初人住東林寺篤志沈博遊化江陵晚還廬山獨宿逆旅時天雨雪中夜始眠見有鬼兵其類甚衆中有一鬼將帶甲挾刃據羌牀坐乃對融厲色揚聲曰君何謂鬼神無靈耶速曳下地融默稱觀世音聲未絕即見所住牀後

西江志 卷一百五
有一天將可長丈餘著黃皮袴褶手提金剛杵植之鬼便驚散甲冑之屬率爲塵粉

安志

法充姓畢九江人住廬山化城寺修定自非僧事未嘗妄履每勸僧衆無以女入寺上損佛化下墜俗謠不聽充歎曰正教不行義須早死遂於香爐峰自投而下誓粉身骨用生淨土後有人上峰頂路望下千有餘仞聞人語聲就而尋之猶活迎還至寺僧感其死諫嚴絕女踪開皇末卒

續

高僧傳

智光江州人開皇十年敕召入京仁壽創塿召送循州途經許部舍利於輿忽放光明高出丈餘比至番州寄停寺內其夜銅鐘自鳴食時方止既達循州道塿塿寺天降甘露於塿邊樹上凝光曜日還京以法自娛晚厭談說尋還廬

阜卒於山舍

豫章書

智錯姓夏侯豫章人住廬山造大林精舍又住西林寺兩處監護皆終其事然守志大林二十餘載足不下山隋文下敕召稱疾不赴後豫章請講亦堅辭之云吾意終山舍豈死城市未幾卒

府志

慧達姓王氏襄陽人幼出家律行精操主西林擬造重閣七間誓用黃楠衆難之忽於境內下巢山見長林滿谷悉是黃楠但窮澗幽邃無由出道師尋行崖壁間見一竇可五尺許光明晃耀盡以衆木投之乃達於江閣遂成無何南向忽偏斜三尺諸匠取正無方忽猛風自石門礮來吹閣還正衆咸異之大業六年七月晦日舊疾忽增七日倚卧異香滿室閣中尊像竝汗流至地衆見此瑞審師當終具

以奏聞卒年八十七

法苑珠林

大志開皇十年來遊廬嶽住峰頂寺介爾一身不避虺虎大業間慨法凌遲乃變服毀形頭擐孝經高聲痛哭三日三夕詣都上表願顯三寶當燃一臂以刀截肉燒鐵烙骨衆咸哀感冬夏一服麤素自甘形極鮮白唇如丹畫言辭爽朗又善文藻撰願誓文七十餘紙

安志

唐

道晔姓周汝南人隋開皇十二年依將軍周羅暉遠屆廬嶽止東林心願匿跡無事音塵山寺法擁勸引非一遂不拒命弘道度人修建僧坊四時無絕隋季寇擾獎撫門徒如初不替貞觀二年示疾夜忽天星大墜翌日喚上座委以後事跣趺而卒諸殿閣門一時自開異香滿寺七日始歇

年八十二

續高僧傳

智閑青州人初依百丈海海卒去依瀉山祐無所悟遂泣辭瀉山抵南陽覩忠國師遺迹遂憩止焉一日因山中芟除草木以瓦礫擊竹作聲俄失笑間廓然省悟遽歸沐浴焚香遙禮瀉山贊曰和尚大悲恩踰父母當時若爲我說却何有今日事耶後謚襲燈大師

傳燈錄

熙怡姓曹桂陽人大曆五年躋五老峰望彭蠡臨瀑布乃構凌雲精舍爲經行之所趨風望景攀危輦重翼如而至者難以數計積十餘年乃止大林精舍杖履衣巾屏居一室行住坐卧無非道場貞元中歸東林戒壇院丙子歲七月召門弟子曰吾隨化還須臾寂滅

府志

師居廬山耶舍塢院外規內寂有神童隨侍左右匿形以至怡智遺形則雙鳥

入掌索取不去灰心與物則二鼠穴處闕前食香積又有
猛虎逐鹿鹿求救於師師指鹿入房虎遂却去

釋氏通鑿

靈徹韋丹爲江西觀察使徹住東林丹以詩寄之曰王事紛
紛無暇日浮生冉冉只如雲已爲平子歸休計五老峰前
必共聞徹酬曰年老心閒無俗慮麻衣草坐亦容身相逢
盡道休官去林下何曾見一人丹與靈徹倡和詩什頗多
韋序曰徹公近以匡廬七詠見寄皆麗絕於文圃七詠者
蓮花峰石鏡虎跑泉聰明水白虎洞鐵船峰康山廟也

溪友議

神湊京兆藍田人具戒於南嶽希操叅禪於鍾陵大寂大曆
八年詔配江州興果寺從僧望移隸東林寺元和十二年
卒師自興果訖東林一盂齋一榻居衣麻寢管如坐七寶

檀施來無虛月盡歸寺藏與大衆共之迨啓手足目前無
長物禮佛四十九年凡十二時未嘗闕一門人道達利誓
元審元惣等封墳建塏思有以識之託白居易爲銘

豫章書

法藏姓周南康人禪齡研尋史籍於醫方尤精有僧卧疾幾
不救藏切脉處方信宿平復其僧善談玄自爾萌出塵之
意後辭親受戒謁大寂禪師言喻若石之投水翛然北下
入廬山登五老峰獨止寒林采橡栗掬溪澗數年有二仙
乘雲而來終日談論寶曆中示滅年八十二

安志

南唐

若虛隱廬山數年持經不出石室江南李氏欽尚其道累徵
終不降就惟言老僧無能寧銷王者歸心若更相呼竄入

深山矣賜衣服則避讓香則受之以乾祐中盛夏坐化身不沮壞今湓城人供養影相焉同上

行因廬山之北有巖如五指下有石窟可三丈餘師晏處其中因號佛手和尚不度弟子有鄰菴僧為之供嘗有異鹿錦囊鳥馴擾其側江南李主三召不起乃堅請就棲賢開堂不逾月潛歸一日微疾謂旁僧曰日午吾去矣及期下牀行數步屹然立化李主備香薪茶毘塏於巖陰師為六祖下八世鹿門真嗣指月錄

宋

緣德字道濟錢塘黃氏縉紳子也少棄恩榮親莫能沮祝髮於朗瞻院受具於天台始習禪那於天龍順德大師尋往江表值洪進山主印忽然大悟江南國主聞其風大建梵

刹

即圓通寺按碑記乃宋乾德二年南唐李後主所建開地之日得金鑄觀音於土中故名圓通召緣德主之

請師住持後值宋將曹翰下江南大統獵狝入寺師覆眾畢獨端趺坐翰至仗劍喝曰曾見殺人不在此的將軍否師曰汝見不怕生死的老和尚麼翰棄劍禮曰眾僧何在師曰聞將軍來故遁翰曰怎生他來師曰鳴鐘則見翰遂鳴鐘不見一人問曰眾何不來師曰老僧鳴則來矣翰請師鳴鐘眾果俱至翰怪之禮問師云將軍鳴鐘有殺伐之聲翰深傾伏之一日集眾告曰吾寂後以青石為塏塏紅吾當再至說偈趺坐端逝圓通紀勝

慧朗江南相宋齊丘請開堂化城寺青原下九世文益法嗣

景德傳燈錄

講經臺北朗公巖相傳宴坐處也

安志

居訥梓州人初以義學冠兩川耆年多下之會有禪者自南

方來以祖道相策發因出蜀放浪荆楚無所得復西至襄
州洞山棲止十年住圓通時仁宗聞其名詔住淨因院將
親召對師稱目疾不赴舉大覺璉以自代熙寧四年無疾
而化指月錄廬陵歐陽文忠聞師道德遠來訪之嘗與夜坐
山亭論道達旦遂作清音亭後東坡亦相訪又作歐蘇夜
話亭圓通紀勝

懷賢温州人居雪竇熙寧三年劉述守九江以圓通召賢欣
然從之工詩字所著頌文集凡五卷安志

常總元豐初革東林律寺為禪席王學士詔出守南昌欲延
寶覺心公公舉總代總宵遁去詔期必得之不得已應命
其徒曰遠公嘗有識記吳滅七百年後有肉身大士革吾
道場今符其語矣住東林十二年厦屋金碧照耀煙雲叢

林之盛近古未有今過虎溪者望總全身無不致景行焉

安志東林照覺常總禪師南嶽十三世嗣臨濟宗五燈會元

大覺璉住阿育王寺初遊廬山至圓通後代居訥應詔賜紫
贈大覺號於是道名大顯繼續祖燈圓通紀勝

可遷名真覺嶺南人住圓通一日東坡作詩訪之師於先夜
定中見空現一寶蓋霞光匝地繞獻師前上有詩文昭入
心目次日東坡果至師先誦詩坡大驚異方出所作詩序
幡蓋以獻之序曰圓通乃先君舊遊之地追念音容蔑以
為悼謹書寶積菩薩獻蓋一首彩幡一對惟冀慈贖以資
冥助耳異日師知時至告衆趺坐而逝同上

慧圓南嶽十三世法嗣臨濟宗遊廬山至東林朋輩見其貌
陋皆戲侮之一日忽顛而仆了然開悟作偈書壁即日離

東林衆傳至照覺覺大喜令人迹其所往竟無知者五燈會元

守端字白雲初住九江承天次遷圓通故號新圓通年甚少奇異敏秀在海會郭功甫訪之師問公牛淳乎曰淳矣師叱之拱手而立師贈以偈曰牛來山中水足草足牛去山中東觸西觸晦堂曰新圓通洞徹見元不忝楊岐之嗣惜乎發用太早非叢林福後師果五十有六終於舒州海會

圓通紀勝

大慧杲九江太守朱某延說法於能仁而以圓通請住持三辭不獲因舉道顏長老補其處舊志云杲居廬山寶慶寺與無垢偈和泉石多佳什安志

賢蓬頭江州人瀉山真如和尚會中角立者見地明機鋒捷

有超師之作但行業不謹一衆易之真如結菴於方丈後令賢獨處後二年舉首衆立僧秉拂說法有大過人處一衆由是改觀住郢州興國道大行示寂肉身不壞同上

道旻字圓機興化仙遊蔡氏子其母夢吞牟尼珠因而有孕生之夕異香滿室五歲口不能言足不能履一日母攜入寺即合掌作禮稱南無佛人大異之他日禮景德寺德祥為師受具後依泐潭乾和尚得悟建中靖國時住江夏灌溪江州郡守張伯達請住圓通入院之夕人報道濟塏紅衆皆駭歎謂師應祖識也於是表達於朝謂圓通有古佛應世時崇寧二年賜紫贈旻古再來妙覺大師政和三年集衆示偈而逝壽六十八敕贈妙空寶塏圓通紀勝

德止圓通禪師也六祖下十四世寶峰照嗣歷陽金紫徐閔

中之季子雙瞳紺碧神光射人弱冠夢異僧授偈四句而有以南安巖主像遺之者即旁所載聰明偈自是持念不忘後一夕忽大悟力求出家父弗許欲以官授之師曰某方將脫世網不著三界豈復刺頭於利名中耶請移授從兄珏遂祝髮受具

指月錄

行機字簡堂住番陽筦山歷二十載羹藜飯黍一日下山聞路旁哀泣聲詢之一家亡兩口貧無殮具師貸衣冠葬之侍郎李椿年曰吾鄉機老有道衲子也加以慈惠及物筦山安能久處乎後郡守林叔達請主圓通法席

圓通紀勝

文雅嗣臨濟宗開法匡廬慧日寺所著有禪本草繼至主席者有明禪師

府志

承古西川諸生也謁南嶽雅雅許入室遊廬山居洪覺塢院

號古塢主後范仲淹守饒迎主薦福

安志

祖可蘇伯固之子養直之弟也常住廬山葛常之云可詩多佳句如懷人更作夢千里歸思欲迷雲一灘窗間一榻茶煙碧門外四山秋葉紅皆清新可喜徐師川作畫虎行末章云即今老舊無新句尚有廬山病可師

同上

元

崇裕字約之姓陳氏自幼敦素依建業龍翔寺法嗣笑隱訢公遯禪師受具次居太平報恩寺數十載脇不至席後遷圓通號扶宗宏辯大師未入院時衆僧夢旻古再來一日自知緣畢集衆說偈面西端逝葬錦屏山下

歐陽玄撰行

錄

善學號古庭東林僧也久依寶覺簡講席簡深契之曰學上

西江志 卷一百五
人可謂名實相副者矣初出世薦福崑山越二年歸東林
專修白業謂同志曰慈雲淨土懺儀明白簡要五悔諸文
皆出華嚴吾欲藉是生安養耳 安志

中峰本住東林寺趙子昂馮海粟皆與往來本常著金剛經
略義以貽子昂見超義邃解金剛者皆不能及其所居菴
凡十數皆名幻住其作菴也馮趙為之躬運土木以執役

云 東林寺志

悅堂祖閻南康周氏子一日閱華嚴至惟一堅密身一切塵
中現忽有省往見別山次見斷橋於言下頓悟久之歸西
林即嗣法雙林明禪師大德九年遷靈隱居四歲說偈坐
逝為南嶽下二十世 五燈續畧

無外宗廓南昌魏氏子初參西林悅堂問溪聲盡是廣長舌

機語相契遂承印記初繼席西林後遷雲居晚住東林說
偈而逝 西林志畧

明

住得湖口人元末祝髮彭澤正覺寺後入廬山證道洪武初
赤脚赴闕言國祚不報歸廬山因號赤脚僧又四年上患
熱疾殆甚得與徐道人訪天眼尊者坐食頃周顛披草衣
至天眼曰彼所持方今至尊所訪也命得送藥服之即愈
初與王奎善永樂中奎以耆民署縣事時旱奎至廬山取
水禱雨得坐石上候之書二符置壺中及衣帶間曰至縣
雨急可焚佩符記於正覺寺設醮相謝以佛燈為驗後果
如其言建醮之夕佛燈飛繞殿角望之如七星今觀音山
猶存七星臺住得一名覺顯 安志

西江志 卷一百五
恒哈穆永樂間入廬山棲水簾洞語言多莫辨久之乃省世
壽一百七十四 同上

惠定永樂時結茅山居先建僧寮延雲水宣德間建佛殿像
設鐘鼓藏經雲堂以至庖福無不備具將造大鐘三千餘
勛未成而逝知事性聰踵成之靈骨藏於下方塏院尊宿

塏中

西林志略

智瑛正統初住雲溪寺因號雲溪初行頭陀行負薪力作已
而有所悟生平不識文字晚乃能詩廬山自天眼後得佛
宗旨者惟智瑛云初語其徒曰某日吾當逝必有風雷之
警又報諸菴主及期既午有片雲起西北瑛乃沐浴具威
儀禮佛退與諸菴主別已而疾風雷震掣茅墮瓦風疾旋
自下上轉入空際瑛已遷化 豫章書

不佻道人天順間居廬山石室題其壁曰一上一上上到匡
廬山眼觀四海身在五雲間芳草連天齊遮鸚鵡綠落花
滿地亂點鷓鴣班洗鉢池邊浪生龍戲躍講經臺畔風嘯
虎生寒此處百丈紅塵飛不到清風明月讓與道人閒後
徙去莫知所終 安志

智素號靜菴嗣法雲溪瑛正德初結廬於赤脚祖塏之側曰
林隱院即今霞封寺也有林隱語錄柳邦傑序之 同上

廣聰號古拙濠梁譚氏子徧叅海內晚師靜菴和尚得入堂
奧為高峰下九世孫卜築擲筆峰下曰彌陀菴潛修不出
葛寅亮易菴名為火蓮院 同上

性空山東人得法於廣西爽菴真愛廬山遂卜居焉今青龍
菴其卓錫處也空雖澁於外緣而精進不欺可為僧範嘉

靖丁巳塏於祖塏之東羅洪先為撰碑銘同上

了堂號徹空手闢寺踞廬山之中以黃龍潭得名堂初至玉屏風下千鹿成羣不可得近默祝曰使此間於我有緣羣鹿當徙翌日不見鹿跡山勢環擁居然勝地桐城吳用先為造滲金毘盧像遶殿應真大士像精巧奇麗閣中龍藏錦袱牙籤琅函方整明神宗皇母慈聖太后所賜也同上仁敬號恭乾金竹坪千佛寺開山僧也慈聖太后遣使致香送滲金佛像奉安藏堂旋以行高賜紫寵之後荆國主施建寶刹壯麗甲山南北最後立枯木堂煅煉禪客府志法船北直寶坻人萬曆初遊廬山卓錫於養鹿池慕遠公之風合大小精舍四十餘處六時念佛以船為宗將逝先期告眾次日有祥雲西來香風入室端坐而逝安志

德清全椒人號憨山隆萬之間禪宗如線清與達觀同時以無師智豁然大悟響動天下相廬山五乳峰誅茅以居遂成禪院肉身塏於此為曹溪迎去著有方便語大學決疑莊子影響說夢遊全集同上

慧燈剡城人南至普陀依大智叅學事畢登廬山豆葉坪傍就竹影晏坐人踪罕至有採藥者遙望一僧趺坐如土塑人返道其事山中始知有燈云府志

三昧寂光律師也萬曆間住東林乙卯至庚申凡六載闡揚淨土弘宣梵網四方學者如草從風後遷江淮神為之請戒晚寓金陵預定時日端坐而逝今其弟子照體號見月住金陵華山為宇內戒師第一東林寺志

照真號一如竟陵尹氏子母陳夢僧託宿乃娠及誕貧不欲

舉溺之數四得人援始育焉長辭親投西塢寺凝公薙髮
受具於三昧崇禎初同王鳴玉過西林廢塢基踏翻一磚
上有字與師名同遂有復興之志時鳴玉持節九江極力
匡護浮屠殿宇不數年而具舉後受先公記荊人稱二西
和尚末年主江上回龍寺未三載遽還西林泊然坐脫
西

林志略

石琳名寂玉初師慧燈後叅天通磬山歸隱漢陽峰北三十
年結茅名松隱

安志

國朝

修遠號石照吉州人博通三藏經指不明燃指為誓徧叩諸
方後嗣法於若昧和尚著有楞嚴正眼華嚴法華金剛圓
覺註疏惟識起性諸論解識蘆林陸寓航其隱修處也一

時講席著名者有水口石生蓮峰融澄鹿池處默石生與
遠尤稱莫逆云

安志

最弱號石生德安蔣氏子十二歲白父母披染於石隱清涼
公二十一秉戒雲棲徧叅諸方依壽昌老人黃檗念憨山
清達觀可皆素所請益者弱以弘教利生為念遂就若昧
受具焉閩中迎住開善寺說法傳戒眾千餘指著有法華
別楞嚴元辰金剛圓覺心經拈及宗山語石隱詩後應講
黃漢間示微疾跣趺而逝

同上

妙光九江謝氏子初業漁晚投孤山白泉寺為僧禪誦精勤
誓生淨土將逝先期白眾積薪如巖念佛入坐命僧舉火
火不即燃手自灼紙取燄大火聚裏恍見金如來眾感念
佛聲振林木塢在孤山寺側

同上

秀恒楚僧也叅雲居顯禪師得契宗旨旋赴九江放生十有六年生平不設牀榻硬坐如枯椿行住坐起大悲經咒行願品不忘於心一日晏處小閣見二童子引幢幡稽首曰上士持念佛咒能不閒停應證阿羅漢果卒之先期別檀越力誦佛號跏趺而逝同上

博凡名本可姑蘇人俗姓馮母高一夕夢僧投宿而娠襁褓中喜趺坐凡見僧即合掌年二十禮慈雲老宿薙髮後秉具於三昧律師四十六歲直造天童弘覺國師乃蒙契證康熙甲辰道過虔州遇屠氏育仁仲俛留止仰坪雙峰者六載庚戌遷古真如寺又十三年壬戌衆請開法西林癸亥七月沐浴跏趺入定夜半奄然而逝春秋六十八西林志略

南安府

唐

五羊仙人大庾縣西南十五里有遊仙鄉開元已前入粵之路相傳騎羊五仙人由此過章水灘鄉因以名名勝志

宋

巢道人上猶人幼遇異人授以辟穀法嘗經月不食自言年九十顏如童子日行三百里盛暑烈日曾不畏避忽一日詣所親曰吾明日歸去果端坐而逝里人異之以爲脫殼云明一統志

王守中嘉祐間居玉仙館修真養靜道行超卓仁宗召至闕下深異之御書萬年觀三字易舊額歸而煉丹於觀後飛鳳山巔丹成召集里中樵牧童子頃之雲合聳身騰空而

去諸童大呼空中墮下二履道侶聞而趨至又墮銅鏡一面皆化為石

上猶縣志

德賢上猶人號棲真尊者治平間結菴丫山元豐五年七月忽自圖其容於壁間偈云片雲歸洞本無心流水下山非有戀書訖而化弟子收靈骨建壇有禱屢應

明一統志

法總潼川人有禪學紹興戊寅至南安與謝堯咨友善一日忽書十元談因語謝曰吾明日入滅君幸茶毘我更十三年同為極樂遊至明晨索浴更衣跏趺而化焚之北郊煙焰中舍利飛颺觀者如堵謝以庚寅歲果卒

同上

性定住大庾蒙川館從下汲為勞以符咒之曰泉且上來與老僧洗鉢逾時香積傍石竇出一水名曰上泉

名勝志

明

大安嘉靖初坐化於南康縣之高靈山朝元閣左今壇院尚存

同上

贛州府

周

涓子齊人好餌朮接食其精至三百年乃見於齊釣於荷澤得鯉魚腹中有符隱於宕山能致風雨受伯陽九九仙法至平固縣山中扣石忽開中有宮室額曰輸寥之館有石笥發之得祕書十卷讀之欣然遂著天人經四十八篇名其山曰覆笥山平固即今興國是也

雲窗私志

漢

木客在興國上洛山自言秦時造阿房宮來此因食木實得不死嘗就民間飲酒賦詩

十道四蕃志

劉瑤英秦末人隨父華避亂石城琉璃山因食異果遂絕粒
容貌頓改獨居縣西二十里山上跨一白鶴往來後仙去
人名其山為仙姑嶺石城志劉常騎白鵝騰空所居之山亦
名白鵝峰宋邑人許褒記

張麗英字金華秦漢之際石鼓山下居人張芒女年十五面
發奇光家有白紈扇恒對以為鏡他日登山得二桃食之
遂忘飢渴長沙王吳芮強委禽焉女曰山有石室中通洞
天能穿石當爾見乃發兵通穴復使聘焉女曰吾為金星
之精降治此山豈塵凡能近乃仰卧被髮覆石上使者以
為死矣忽紫雲鬱起失女所在當沖舉時歌詩十八章今
存其五一曰石鼓石鼓悲哉下土自我來觀民生實苦二
曰哀哀世事悠悠我意不可忤兮王威不可奪兮余志三

曰有鸞有鳳自舞自歌何為不去蒙垢實多四曰凌雲爍
漢遠絕塵羅世人之子於我其何五曰暫來期會運往即
乖父兮母兮無傷我懷名勝志

六朝

安道士不知何許人宋元嘉中披服巾褐棲巖之赤石山中
數十年忽失所在後有復見之者竟不可即南康記

五代

謝仙翁瑞金人後周時登龍霧嶂採樵偶於池測見二女奕
從旁觀之女食桃遺核因取食之不飢奕罷恍失所在謝
駭而歸不知若干年矣後翁入山莫可踪跡里人為立祠
名曰寶仙呼池曰仙女名勝志

梁真人名守抃初入零都北斗山紫霄觀學道將仙去朝中

有聞遣殿使來召真人市脯酒爲勞齋葷同釜以瓢浮而
隔之殿使臨視曰齋未熟而葷先熟何也真人曰火候未
到待拾薪來已而折檜一枝倒懸丹竈傍登木杪浮雲而
去不知所之 名勝志

宋

徐繼先王齊祥石城縣東一里峰子山太極觀中有紫竹昇
仙二臺相傳徐王二真人飛昇之處輿地紀勝云大中祥
符時里有許家女爲鬼所魅禱於龍虎山真人曰太極觀
有二仙盍不就近求之遂還叩觀門見紫竹臺上有對奕
者前詣乞哀爲援筆書符於許之掌令往某廟爐內熏之
須臾雷起廟焚其妖遂息二道人投筆草中即去莫知所
之後有商於金陵者遇之廛市中語曰汝賈吾鄉其利當

倍若去願寄二饅首於吾師商登舟引帆睡未覺而舟已
至即以饅首畀其師熱氣猶浮浮人始知其爲仙去云 府志

李思聰贛縣人幼爲祥符宮道士嘗遇異人與一寶鏡曰此
神遊指南也思聰每閉戶懸鏡而卧移日方興輒憶其所
遊洞天海嶽凡模寫六圖并題以詩皇祐間乾元聖節將
臨以呈郡守上之上喜賜號洞淵大師冲妙先生遣中使
賫香茶絹疋賜之至之日羽化去 府志

元

田純靜自浙至贛修煉於景德觀一日尸解朝天門外令人
棄之江中江水湍急尸不流口猶頌云六十八年老拙平
生不會扭捏今日撒手便行獨伴清風明月 安志

明

劉淵然贛縣人祥符宮道士師趙原陽授丹訣呼召風雷有
驗洪武二十六年召至京師見便殿賜號高道館朝天宮
永樂中從駕至北京洪熙初封沖虛至道元妙無為光範
演教莊靜普濟長春真人賜二品印宣德初乞骸骨特賜
御製山水圖歌送歸南京朝天宮養老淵然有道術清靜
自守不干世事故為累朝所禮張宇初之術淵然所授也
年八十二卒比入殮凡七日端坐如生

明史董

唐

圓明蘄黃人武德中往曹溪參六祖道經贛見一青蛇橫道
吐去復來心忽覺悟四顧山勢清高遂以錫杖插其處祝
曰曹溪還此杖存是吾道場也三年返錫杖如故遂創寺

居焉一日趺化

安志

西堂智藏虔州廖氏子七歲出家有相者謂之曰骨氣非凡
當為法王輔佐年十三事馬祖於臨川七年遂受其法後
於龔公山付授衲袈袋元和十二年歸寂塋曰大寶光郡
守唐技為之銘碑暨寶光寺初謚大宣教禪師再謚大覺

禪師

傳燈錄

法通其母年七十如寐而生幼好釋師事國蹤禪師國蹤者
智藏之上足弟子也居開元寺法通將復智藏舊建之所
於龔公山默念觀音不食累日精感山靈靈泉湧出遠近
癘者病者輒蠲獲施甚廣其塋一歲而就

寶光塋碑

五代

僧伽姓吳名文祐家信豐祝髮為僧聞贛鹿山異秀杖錫攀

躋蛇馴虎伏居久之去雩都止明覺寺僧伽院飲酒食肉
與市井浮沈嘗持松梢行歌曰趙家天子趙家王莫測其
所謂皆笑爲狂蓋謂宋將興也孫德俊之汀州謁定應禪
師師曰汝雩陽有佛何以禮我遂告歸因寄一扇與僧伽
舟還僧伽迎問曰吾師寄扇安在由是邑人號爲生佛祥
符已酉六月六日跌化人不忍火以金漆塗其身祀焉後
忽有竹生其牀下開禧初敕封靈濟禪師嘉禧加慈祐咸
淳加慧應明解縉記其事甚詳 安志

宋

靈照建隆中住安遠縣壽昌寺絕粒咽氣居巖罅中淳化五
年示寂語其徒曰吾入塏後二十年可開視之祥符中其
徒啓塏梵相如生 名勝志

兜率從悅贛州熊氏子初謁雲蓋智和尚令謁洞山文和尚
深領奧旨嗣真靜一日張商英按部分寧就雲巖說法甚
多往復室中嘗設三語以驗學者一曰撥草瞻風祇圖見
性即今上人性在甚麼處二曰識得自性方脫生死眼光
落地時作麼生三曰脫得生死便知去處四大分離向甚
麼處元祐六年冬浴訖奄然而化其徒遵遺誡欲火葬之
捐骨江中無盡居士遣使持祭且曰師於祖宗門下有大道
力不可使來者無所起敬俾塏於龍安之乳峰爲特請
於朝追謚真寂大師 安志

顯首座贛人保寧勇禪師首座賦性高逸機辨自將尋謁端
禪師於白雲旣而遊湘西寓鹿苑真如禪師使之分座接
納久而歸贛上傳住西堂而終 釋曉瑩羅湖墅錄

行本贛縣北百里合龍山先是荒寂有僧作草菴於山下村
農姜氏生一男出胞垂眉長三尺不食乳日自長大父母
怪之寄之僧舍為徒呼小道者七歲猶不能言召至京師
入宮忽能語仁宗喜詔令削髮賜名行本時年十二錫賚
珍物并後宮所賜直千萬貫還鄉創為大寺屢年工甫畢
行本對佛合掌跏趺而逝寺中金龕羅漢及御書法名尚
存棟宇皆良材雖厠溷亦櫛木或有欲易為什器者必遭
蛇虎之害一鄉敬事至今不衰

傳燈錄

明

淨洪新淦儒家子年十三偏叅知識密受心印至雩都龍口
獨肩一蒲團夜坐羣虎猝至吐之虎遁去遂結茅焉一夕
召眾至前豎拂曰一領破衲衣留與易善換僧問故師曰

時到便來沙桶自開沙歸大海坐我蓮臺言訖趺坐而逝
時正德七年也徒如其言以沙桶封之後三年一人過菴
中拜師舊方丈忽有聲如雷沙桶自開顏色如生爪髮再
長僧眾訝之問其人姓名曰易善具告以故善遂以金漆
聖飾之歷今法身猶存

府志

盧禪師興國縣金斗山有盧禪巖師學佛脫跡於此洞壁鐫
盧師坐禪象尚存嘉靖中邑令盧宁嘗遊此山題詩徬徨
不能去自以姓與禪合更號冠巖以據有之

漱水志林

明圓隆慶六年三月自寧都至會昌得漢溪巖或曰是榛莽
之區蛇虺之窟也止其徒於外獨深入冥心寂坐中夜鬼
擲沙石盈膝前不為動詰朝望空作禮曰山靈許我當以
鐘鼓三聲為信祝未已應之如響於是誅茅結菴出入從

石上攀躋頗覺艱澁向石壁持呪不輟忽雷電晦冥石
劃然開五尺許自是山之奇跡日顯名勝志

國朝

明了蓮塘菴僧不諳文字或質以經典輒能應答有其妻病
禱於賴神祠病者忽曰送明師過橋矣衆往視見明了於
橋畔丙戌上元語人曰後二年邑有寇難公等早圖之老
僧將別越五日對衆作偈合掌趺坐而逝及戊子果如所
言府志

朝宗名通忍毘陵陳氏子十歲能文年過二十披剃叅密雲
和尚於金粟後透徹綱宗癸未請住龔公山寶華寺先是
龐居士植方竹於寺遺識云方竹過街祖師再來忍至適
符其兆松陵葉大理紹顥爲謨塏銘朝宗語錄

西江志卷第一百五

西江志卷一百六

西江志卷第一百六

方技

儒先之道旁兼游藝教統乎同學通乎類奈何不古爰逮
叔季名擅專家人懷私智星躔推命堪輿測地惟卜與醫
吉凶攸繫降而愈下寸長末技刻鵠雕蟲殆同兒戲苟肆
斯業必詣其至小道可觀多能不鄙作方技志

南昌府

漢

唐檀字子產豫章南昌人少遊太學習京氏易顏氏春秋韓
詩尤好災異星占後還鄉里教授百餘人元初六年郡界
有芝草生太守劉祗欲上言之以問檀檀對曰方今外戚
豪盛陽道微弱斯豈嘉瑞乎乃止永寧元年南昌有婦人

生四子祇復問檀變異之應檀謂京師當有兵氣其禍發於蕭牆延光四年黃門孫程揚兵殿省誅皇后兄車騎將軍嚴顯等立濟陽王為天子果如所言永建五年舉孝廉除郎中時白虹貫日檀上便宜三事陳其咎徵棄官歸著書二十篇名為唐子

後漢方術傳

唐

崔季真洪州人家於郡西善鼓琴工繪事大曆中一夜大雪見有老人避雪門下者神骨非常延入具麥麵以進老人曰麥稟四時之氣穀之善者沃以豉汁則彌佳又具松花酒以進老人曰花澀無味乃探懷中藥投之酒味頓美隨遺藥數丸圖一幅而去後季真出示茅山李合光合光曰此葛洪季子也季真好養生之術以故有仙緣云

安志

胡超僧洪州人聖曆中出家學道隱白鶴山微有法術自云數百歲則天使合長生藥所費巨萬三年乃成自進藥於三陽宮則天服之以為神妙望與彭祖同壽改元久視放超還山賞賜甚厚服藥之後二年則天崩

朝野僉載

朱邨豫章人精於周易得京管之遺法建中初遊楚賣卜青山人董元範母患奇病至夜即發邨為筮之得解之上六曰君今日昃且衫服於道側伺有執弓挾矢而過者君向求之時邑人李楚賓喜獵其時果至元範邀之至家設酒饌留宿是夜月明如晝楚賓出戶徘徊見一大鳥飛集舍上引喙啄屋即聞堂內叫痛苦聲楚賓引弓射之兩發皆中其鳥飛去痛聲亦止明日與元範四索於敗屋中得確捏古址兩箭著其上皆有血光取焚之母患遂平

太平廣

李生中和末以明經應舉如長安途中遇一道士同行言意相得因言黃白術道士曰點化神仙小術也但世人多貪將以濟其侈故仙道祕之吾觀子性靜寡慾似可教者今以方授子可以濟乏絕而已如遂能不仕亦當不匱衣食得祿則弗復為如為之則貪也仙道所不許也因手疏方授之別書藥草數種李每遇乏絕依方為之無不成者及為南昌令復為之絕不成矣從子智修為沙門李以數丸與之智修後遊鍾陵止賣藥家燒銀得二十兩以易衣時劉仁規為刺史方好其事為人所告幸而得免搜神記沈應善字喜言梁休文後裔其六世祖仕豫章因家焉事親至孝親歿廬墓三年閭里稱之屢試不售一夕夢神人示

曰上帝命汝活千萬人寧可守一編以自負乎既寤遂決志學醫遇蜀之韓隱菴師事焉初授素問內經諸書研究不輟徐進以導引之學及祕藏諸方三年韓別去曰九九之際遲我於峩媚之麓自是名益振凡士大夫無不與之遊投以劑罔弗驗者歲癘則捐貲貯藥以濟人之求靡有倦色居傍構一舍曰來安堂諸藥餌飲食無不具備羈旅貧苦者聞聲麇集年八十一忽語家人曰韓先生招以緘我將逝矣尋沐浴而卒著素問箋釋二卷醫貫集補二卷子長庚以經業補弟子員能世其學安志

司馬頭陀名曦唐時人習堪輿家言歷覽洪都諸山鈴地一百七十餘處訖今猶驗一日至奉新叅百丈曰近於湖南得一山乃一千五百善知識所居百丈曰老僧可住否曰

不可和尚骨相彼骨山也時華林覺為首座詢之不許一見典座靈佑曰此為山主人也後往往住山連帥李景讓率眾建梵宇請於朝賜號同慶寺天下禪學輻輳竟如其言

安志

按豫章書以司馬頭陀劉潛為一人潛著達僧問答乃宋人也今從安志

夏主信新吳浮雲宮道士能運掌心雷治石精至今丫口石尚存凡祈晴禱雨輒應

府志

厲歸真唐末道士遊洪都信果觀見三官殿內功德塑像是玄宗時夾紵制作甚妙多被雀鴿糞穢其上歸真遂於殿壁畫一鴿筆跡奇絕自是雀鴿無復棲止尤能畫折竹野鵲後傳歸真於羅浮山上昇

玉堂閑話

五代

豫章術者臨安縣錄事鍾起有子數人與錢鏐飲博起嘗禁諸子諸子多竊從之遊豫章人有善術者望牛斗間有王氣牛斗錢塘分也因遊錢塘占之在臨安乃之臨安以相法隱市中陰求其人起與術者善術者私謂起曰占君縣有貴人求之市中不可得視君之相貴矣然不足當之起乃為置酒悉召縣中賢豪為會陰令術者徧視之皆不足當一日術者過起家鏐適在外來見起反走術者望見之大驚曰此真貴人也起笑曰此吾旁舍錢生耳術者召鏐至熟視之顧起曰君之貴因此人也乃慰鏐曰子骨相非常願自愛因與起訣曰吾求其人者非有所欲也直欲質吾術耳明日去

五代史

宋

王仔昔洪州人始學儒自言遇許遜得大洞隱書豁落七元之祕出遊嵩山能道人未來事政和中召見賜號沖隱處士帝以旱祈雨每遣小黃門持紙求仔昔畫日又至忽篆符其上仍細書焚符湯沃而洗之黃門懼不肯受強之乃持去帝蓋默祝爲宮妃療赤眼者用其說一沃立愈進封通妙先生居上清寶籙宮獻議九鼎神器不可藏於外乃於禁中建圓象徽調閣以貯之仔昔倨傲又少戇帝嘗待以客禮故其遇巨闡殆若童奴及林靈素有寵忌之陷以事囚之東太乙宮旋坐言語不遜下獄死仔昔之得罪宦者馮浩力最多未死時書示其徒曰上蔡遇冤人其後浩南竄至上蔡被誅

宋史

僧巨然鍾陵人工山水深得佳趣知名於時每下筆如文人學士得題賦詠詞源滾滾出於毫端比物連類激昂頓挫無所不有巨然山水於峰嶺崖竇之外下至林麓猶作卵石松柏疎筠蔓草之類相與映發而幽谿細路屈曲縈帶竹籬茅舍斷橋危棧真若山間景趣也今御府所藏一百二十有六

宣和畫譜

楊補之字無咎南昌人自號逃禪老人又號清曠長者水墨人物學李伯時梅竹松石水仙筆法清淡閒野爲世六絕高宗朝屢徵不起

安志

楊季衡補之之姪畫墨梅甚得家法又能作水墨翎毛同邑劉夢良亦善寫墨梅補之甥湯正仲字叔雅後居黃巖自號閒菴善畫梅竹松石清雅如傅粉之色水仙蘭亦佳大

抵宗補之而別出新意全上

李頗一作坡南昌人善畫竹氣韻飄舉落筆有生意顧所傳於世者不多也全上

鐸長老俗姓辜南昌人以形家術周流郡中談禍福若符契嘗為南昌劉長者相地葬其夫婦觀者殊易之久之長者孕日繁昌衣冠濟濟又為豐城湖茫李姓卜兆初啓土時鐸輒辭去且戒之曰吾返寺鳴鐘始可窆棺未至偶他寺鳴鐘遂窆棺則鐸震死於途矣李之族自後始大明初則南昌劉子南新建趙子方豐城何野雲亦其亞也同上

元

傅椿年字莊叟進賢人有法術能驅雷盪妖元至元丙子以安集功授奉新尉不起安志

明

徐復高奉新縣崇元觀道士通法術永樂十五年旱復高至省城祈禱坐七層臺上案振金牌則雷鳴手搖小旗則雷掣時大雨傾盆魚蝦盈街章江水淺三尺安志

張粲字宗禮新建人少業儒多病因精於醫療人有奇效素以濟急為心未嘗責報遇貧困輒施金遺粟賴以活者甚眾寧獻王賢之舉為良醫人多以仙名之年七十三卒胡頤菴為之銘子升繼其職行誼尤著官教授孫元椿進士任知府元龍亦舉於鄉林志

楊節譽進賢人受學於傅椿年天順中召至京師試以法能指揮風雨宮殿妖氣遂以蕩滅授帶俸錦衣衛指揮使不受嘗自詠曰三朝鷓序班聯肅九度龍顏面問奇後不知

所在相傳謂之楊法師 安志

王大國字邑郊南昌人屢舉不第後患痰疾遇異人授以素問內經及祕藏諸方遂精醫學一日異人叩之無不切中肯綮曰勉之不日當以醫聖名世吾經行天下未見如子之驚異絕人者同里杜氏有子年幼久患瘰癧服藥無效大國投以二丸即日平復南昌司理胡慎三左足患癱直穿脚底醫數易而為癰日甚大國至命急去敷藥止服湯劑三四日瘡口漸合二十日肌肉平滿入

國朝巡撫蔡士英監臨鄉闈背疽大作大國為調理不惟速愈且絕不作楚德之甚載入撫江集中以奇其事同時有何述樵者精於痘科人以二仙稱之 全上

國朝

八大山人名耆初為高僧往來南昌常持八大人圓覺經遂自號曰八大有仙才隱於書畫題跋多奇慧不甚可解畫之最佳者松蓮石三種書法能懸腕作米家小楷行書深得董華亭意世皆以為狂及逢知己十日五日盡其能絕無狂態 龍科寶記

瑞州府

宋

無名相士精風鑑筠州太守聞之為徧召賓僚試其術時曹利用為巡檢同王務本在座相者言利用後當極貴坐客皆笑復問務本何時登第曰須巡檢入兩府時耳客皆曰烏有是後利用以使契丹有功為閣門使十年間列位樞府而務本適登第後為海州推官 府志

彭攀龍字淵材新昌人工於樂律獻樂書於朝為協律郎飭粥不給乃歸

安志

鄒王臣字元佐涉獵書傳精通五行以人之年月時日推其壽夭禍福貴賤貧富萬不差一自言凡看命須隨所見即談無不奇中若稍涉思慮則相去遂遠矣著有洪範福極彞倫奧旨五卷貴命四十九格行於世

全上

陳善字德成新昌人以策授承信郎歷臨安幕監岳州軍改江西憲幕得父建龍虎山之術鞭霆致雨每歲旱賴其祈禱號月湖先生

全上

方子明道人也寓高安聖壽寺蘇子由贈以詩有水汞成銀利十倍丹砂為金世無對之句

樂城集

元

周德清高安人工樂府精通音律著中原音韻虞伯生序之

安志

潘濤上高人累世以業醫顯名至濤益著著醫學繩墨一書其目有十一切脉二問症三斷病四辨逆順五明標本六立治七審輕重八處方九用藥十調理行於世

全上

曾義山一名法興上高人善占術青田劉基丞高安法興過之語曰相公聰明絕世而器宏遠當為一代偉人吾書盡以相贈基借觀乾象諸書法興以原本畀之曰吾不欲留此以為家禍也後明太祖嘗問基知所授受乃令有司為法興營居室表其墳墓

全上

明

劉侶字豫甫上高人元季瑞州路學正與高安丞劉基奉新

西江志 卷一百六
胡泰為友精於易卜世亂棄官家居懸棹為識號銀河棹
與人言吉凶無不立驗凡上高業陰陽術者悉祖之洪武
初以薦舉復任本學訓導著有銀河棹外編上高縣志
鄧詳甫高安隱士也嘗遇異人授象緯韜鈴之祕避世不仕
劉基來丞高安詳甫見而奇之基與遊盡得其蘊論者比
之圯上老人云安志

李綢善地理為世宗營壽陵特授欽天監博士

新昌縣志

胡任高安人醫術最精利濟甚廣著有醫方諸集

安志

姜宸進賢人以醫久寓高安頗有儒行萬曆戊子己丑間連
荒所在病疫宸施藥濟困所活良多貧者尤德之全上

袁州府

南唐

何溥字會通袁州宜春人天資穎異善地理家言元宗聞其
賢累詔起之擢國子祭酒保大中鄒廷翊相皇陵於牛頭
山溥言不利極表諫諍忤旨謫休寧令溥至邑即改縣基
吳王墓後倚松蘿山前名真武下壇形未幾卜地縣東南
隅居焉舍前削石按太極八卦諸圖茂林修竹時時披襟
嘯傲其間後主時復徵不起隱芙蓉山薊髮為頭陀雖假
迹禪門絕不譚釋語每誦道德經必歎曰真聖人也孔子
豈欺我哉由是專修長生煉化之術所著論氣正訣一卷
傳世十國春秋

臨江府

宋

鄒公新淦人寧宗時有雷擊物為產婦所觸不能上升時鄒

巫能誦解咒忽有神請曰爲誦解穢咒千遍當有以報鄒誦訖神授鞭印各一曰祈晴順印祈雨倒印用鞭畫空雨止畫處神忽不見雷升天矣鄒平生喜食鴨嘗過其女留殺鴨爲黍時曬麥於庭天有雨勢女欲收而後饌曰雨當無損於麥須臾大雨鄒望空四向而畫獨庭無雨由是遠近人招之祈禱如法用印無不立應年九十餘卒鞭印亦亡鄉人祀之玉笥山承天宮前廟中號曰鄒公

異聞錄

吉安府

唐

劉守真善調風角揚州刺史楊行密遣將周本圖吉州與刺史彭玕戰於象牙潭玕敗走立寨新淦楓岡聞守真名召至軍中每逆戰守真以術厭之敵不能破一夕劉死玕戰

不利棄寨去

江南野史

宋

劉元賓連舉於鄉任潭州司李通陰陽醫藥術數真宗試之驗賜名通真子所著有集正曆橫天卦圖神巧萬金方註解叔和脉訣傷寒論洞天鍼灸經

安福縣志

彭仲元安福人得星禽之術善占候風雲太平興國初郡守王延範署爲防城辛酉温仲舒向敏中皆始倅廬陵而仲元言其當大貴不數年二人果登輔相大中祥符中詔入署北御園指揮使言國家事頗奇中

安志

達僧姓劉氏居安福下村水南院善地理著有撼龍經天元一炁諸書

吉安府志

劉德昇遇異人授大衍數能於掌中知未來事王瀘溪嘗贈

以西江志卷一百六
以文 安福縣志

劉惠卿以善醫名楊誠齋贈之詩有活却千人藥一囊陰功吹作滿城香之句 安志

元

王東野永新人精方脉嘗著本草經當時知名任太醫院御醫虞文靖揭文安程雪樓劉申齋趙子昂咸與之交而尤厚趙魏公以本官致仕歸邑人曠處良傳其學 永新縣志

藍玉仲永新人精方脉預言人禍福壽夭奇中體豐龐善飯士大夫家爭輿致之其起人痼瘵或以一劑或因前醫所立方增減一二或亦無所增減第稍差等分無不立效或曰其術多得之藍元初玉仲族叔父也 安志

劉嬾窩安福人少卓犖里晏氏子病危忽一道人款門曰與

錢千貫吾當治之晏委錢恣所取道人日攜百錢飲酒家暮醉則歸忽早作呼晏辦一犬置病子前令健夫夾持之道人坐其後默攻之病子苦甚欲起戒夾者堅勿動夕乃罷明日又如之病脫然矣其犬一夕垂絕嬾窩視而歎曰術則奇矣如犬何道人喜曰仁言也復命取一新磚置犬前如前攻之犬則搖尾去磚則墳矣更不受謝取書數卷授嬾窩去遂以醫名世 全上

潘碧山安成人善風鑑傳與礪贈以詩有直言往往驚四座乃使世人畏其口之句 傳與礪集

謝茂德精岐黃之術時以仙翁目之傳若金贈以詩 全上

彭用光廬陵人善太素脉言多奇驗所著有體仁彙編 安志

王昂廬陵人通古今諸醫書人有危疾集郡中諸醫無能療者昂投劑立應其不可者任羣醫出計施巧不活也嘗語人曰余每遇疾艱危未嘗不退而深思求為必活之計又曰醫以輔養元氣非與疾求勝也夫與疾求勝者非味雜辛烈性極毒猛則得效不速務速效者隱禍亦深吾寧持久緩待其自復也人有疾輒往視之不責其報詳見羅念

菴墓誌 全上

周騎龍廬陵人成化間以善談祿命著名豫章尤精範圍數御史趙啟按江右威望甚著及瓜當還朝騎龍曰不然行有西北之調啟頗疑之未幾調晉臬啟問之騎龍曰公元數一六六四會數一七四數有從臣清要捧天書烏臺青瑣遷藩臬之句何可逃也啟始服其術因求範圍歌訣為

之序而梓之以廣其傳 豫章書

郭修翰永豐人父益懋為諸生僑寓惠州興寧生修翰讀易讀史手不釋卷母盲廢自謂採給行傭吾不如江次翁遂窮天文七政諸書賣卜於市得錢供母星學名一時有人問壽曰子不及糴迨五月三日其人怒反詰之曰吾糴及釜矣越明日疾作張督府岳以司馬內召過程鄉召問之對曰猶寄長城三歲張愕然尋有麻陽之命言王方伯當大用一歲兩遷但不得專敕王曰方伯例必列銜中丞撫一重鎮何為無敕果尹京兆再遷卿陸方伯杰深信之薦於丘大叅民範言其旬日必及禍丘怒欲罪之以出陸門下姑遣人守之使不得逸去至期果蓋棺貳守莫同自惜不及第恒俯首於人修翰言一歲入召再歲按察提刑若

持左券然庚戌六月病羅俶問之修翰曰而命當先我死
猶來問訊耶初三羅無病驟卒修翰自知死期云我六旬
有六六月六日無生理果然 廣東通志

趙銓字仲衡廬陵高唐里人精岐黃術制業仍不廢以諸生
貢於朝仕靈壽霍山兩邑夏貴溪大拜入京夜泊吳城靜
中忽傳呼聲雜以絲竹金革市驛交喧月下隱隱有宣言
藥王到者貴溪詢藥王何人曰姓趙已而寂然乃銓舟至
貴溪索見與語大加賞異即同入京會世廟不豫太醫束手
貴溪及大臣公卿咸舉銓入診視不終劑而聖躬大安
後解組歸惟著書修真而已有乞醫者即赴之不責人金
帛而施藥不怠又善太素脉清江蕭須山病篤銓往適病
者假寐先診其長子取酒相賀曰子脉無憂何妨乎父壽

投一劑而愈出都門時見一死者已含斂方下棺銓下馬
啓其衣衾令取沸水下刀圭灌之而甦其神類如此銓臨
終無病腹中閣閣作聲笑曰龍吟虎嘯風雲慶會吾當赴
之有頃異香滿室見頂上一道光采冉冉而上而銓坐逝
矣經日如生所著有春風堂集石亭醫安岐黃奧旨諸家
醫斷太素脉訣 廬陵縣志

陳宗文泰和人幼遇異人授以醫術凡診人脉或無病而言
死或易箒而言生或在童時而言終身貴賤壽夭無不奇
中嗜酒豪邁視利如土苴 安志

蕭公伯泰和人善畫照其染色處可占人榮枯不但肖之而
已時有畫師寓邑之普覺寺公伯慕其名往事之盡得其
法一日汲水故遲至師責之公伯曰適見二鬼鬪因忘歸

遂以水畫地作狀師大驚服遂有名全上
郭詡號青狂泰和人善雜畫信手作人物輒有奇趣而詩尤
過之其姪巖學之益精妙竝入圖繪寶鑑全上

撫州府

宋

陳自明字良甫臨川人精於醫以李師聖郭稽中所著產論
室慶諸集綱領漫而無統節目畧而未備醫者不能深求
徧覽乃採摭諸家附以家傳驗方編輯成書凡八門數十
餘體總二百六十餘論論後列方是為大全良方金壇王
肯堂為證治準繩女科一部全用之安志

元

普稱撫州僧也至元間人初唐一行禪師作星曆書十有三

家誓曰國興則見未興則隱後青城山僧號枯木傳此書
於史彌遠家至普稱又得其傳而後四明慧月號琴堂者
挾斯文至大都明南昌僧號普菴復獲此書於天界寺授
括蒼季宗舒遂揚其波至今稱琴堂五星云星學大成

明

曾易明金谿人景泰中遇異僧授以堪輿家術為人卜地衰
旺興廢輒先定其年月日時皆奇中臨川饒氏館易明於
家者三年事之特謹然終不敢以地請最後易明乃指示
曰某可墳某可宅卒賴其力或以富貴傲即有重賄輒拂
衣去不娶妻無子漸能辟穀不知所終安志

李興生樂安人患風痺欲飲食則仆卧於地始能下咽欲言
則畫地作字始達其意頗能詩董侍御未第時獻詩曰清

西江志 卷一百六
時早展為霖手莫遣蒼生望八荒後董欲養於官辭以母老為作傳比之支離子與之流亞云 全上

張神峰臨川人精星學以五行祿命諸書沿習訛舛著闢謬一書海內星平皆宗之 全上

建昌府

宋

廖應淮字學海南城人年三十遊杭叩關投匭疏丁大全誤國狀配漢陽行歌出國門人皆壯之遇蜀人杜可久為禱營將脫其戎籍授以邵子先天易數其算由先天起數應淮神警一問輒了嘗坐臨安樓市大衍卜卜已輒閉樓危坐取一環按劍自鍛之當火少休則危坐以為常曾過曾淵子家索酒飲酣抵掌放歌見賈似道直言宋鼎將移語

畢亦徑出國子監簿吳浚以先天易筭陰符經六花陳法欲上之應淮擲其藁於地曰誤天下國家者此書也浚欲從之受易罵曰若黃口兒可以語此人皆邵子矣後以其數學授進士彭復之以傳鄱陽傅立著有元元集曆髓星野指南象滋說會補畫前妙旨約十萬言宋文憲濂以為廖生聰明絕人而未聞道卒局於數云 宋史

廣信府

宋

俞直玉山人通素問玉冊之書內外常變之辨至河洛易象太元之數三統九經五行納音之旨無不求其義而為說秦檜為相時欲館置直謝不肯就紹興辛巳金人犯淮用事者遣使問以兵退之期言皆切中惜後世無有傳其書

鄭同字亦虛玉山人以行義見推於鄉尤精書法舉八行科而不果上米元章與同帖云晝寢夢龍蛇遶榻及覺乃小兒披來翰也其稱之如此 安志

葉子仁上饒人推算筮占往往如破的歲乙酉真文忠方在班子仁以書勸補外甚力未幾果去國子仁每推論五行輒以善道勉人如孝弟忠信清心寡欲等語未嘗不懇切言之真文忠贈以絕句云易象推占妙入神勸人忠孝更諄諄只今誰似君平術惟有南陽賣卜人 信乘續詩

元

方壺子姓方氏名無隅龍虎山人學仙於金蓬頭結社於張孟循盧伯良其畫冠絕一時尤精於竹張宇初稱為壺仙

嘗於高石徐氏畫青山白雲圖學士虞集題句 畫史會要

張與材字甲梁號薇山別號廣微子善畫竹與龍張嗣成號

太玄能畫龍亦畫有廬山圖張嗣德號太乙善寫墨竹禽

鳥吳霞居龍虎山善畫龍 全上

明

林森上饒人家世業醫資性靈朗博究羣書郡舉任醫學正科活人之功不可勝紀 安志

周詔字天章上饒人為人俊雅出塵輕財好義嘗於江湖中遇異人授以地理指掌圖盡得山川源委脉絡之詳以是邃於地理蔡虛齋稱其談論符經義脫世味有近道之資欲論薦之未果因為序以見意 全上

張祉字天與鉛山人幼習舉子業因繼母疾不愈遂棄所業

西江志 卷一百六
編訪名醫傳鍼灸之法為人尚義人病多賴以生更不責報善書能詩所著有筠石集 府志

程福生字梅巖玉山人精書法燕京承天門關王廟石碑其真跡也八分書尤工畫梅清瘦絕倫有金石遺文四本 安志

洪濤弋陽人少業儒後專醫每施藥濟人如神授太醫院副從征交趾軍中大疫濤以蒼朮黃柏百鍋煮之徧飲皆愈改榮藩良醫正王缺唇濤搗藥補之如天成賜建國醫坊號為補唇先生年九十致仕 全上

王適字太古玉山人初充府掾棄去究詩書尤工畫十許年聲名藉藉人以畫強索不肯褻應遇知己酒酣輿到下筆淋漓殊足珍玩所著太古集二卷傳世 全上

丘可封字汝禮貴溪人由歲貢歷官國子典簿博覽羣書通天文尤精素問與人切太素脉談休咎終身不爽所著有醫書及經驗奇方多出自創 府志

饒州府

唐

柳翁天祐中人常乘小舟釣鄱陽江中凡水族之類與山川深遠者無不周知鄱陽漁者咸咨訪而行呂師造為刺史修城掘濠至城北則雨止役則晴或問柳翁翁曰此下龍穴也震動其上則龍不安而出穴龍出則雨掘之不已則霖雨方將為患既深數丈果得方木長數尺交構疊之累積數十重其下霧氣衝人不可入而止木皆腥涎縈之刻削平正非人力所為自是果霖雨為患呂氏諸子將網魚

鄱江召問翁翁曰南岸一處今日有魚然有一小龍在焉諸子不信網之果大獲舟中以巨盆貯之有一鯉長一二尺雙目精明有二長鬚遶盆行羣魚皆從將之北岸遂失所在柳竟不知所終

稽神錄

郭常饒州人業醫饒江其南導自閩頗通商海外波斯安息之貨國人有轉估於饒者病且亟他醫莫能治請常為診曰病可去也估曰誠能生我當酬錢五十萬常因舍之先以鍼火雜治導其血關然後輔以奇藥月餘而愈欲歸常所許財不受估曰先生以為寡歟常曰吾直吾之藥計吾之功不能損千文而所受非任反禍耳人以常為詐而責常常曰夫販賣之人計量於毫銖之間今奪其五十萬則必追恡鬱惋寧能離其心且藥加於人病新去而六腑方

憊復有悒然之氣自內而伐即不可救奈何彼方有疾時知我能治而告我我幸免之因利其財又使其死是獨不畏為不仁而神可欺者吾何敢欺

沈亞之集

宋

吳景鸞字仲翔德興人漢長沙王芮裔孫祖法旺喜天文地理之學聞華山陳搏洞徹祕奧遣子克誠往師之得其肯綮一日搏命之歸曰汝子仙才能紹業盡以青囊書授克誠誠子即景鸞也聰慧過人得其書精究有驗慶曆辛巳詔選精陰陽者郡縣舉景鸞至京入對稱旨授司天監正未幾因論牛頭山山陵章奏過直有坤風側射厄當國母離宮坎水直流禍應至尊下殿之語上不悅下獄尋以帝晏駕遇赦又進中餘圖不報知時不可遂佯狂髡髮修真

於天門西岸白雲山洞往來饒信二州數處同日皆有景鸞跡治平初一日忽以遺書付其女沐浴更衣端坐而逝所著有理氣心印吳公解義

安志

傅伯通德興人與鄒仲容同師廖金精金精得之吳景鸞宋南遷伯通拜詔往相臨安表畧曰顧此三吳之會實為百粵之衝錢氏以之開數世之基郭璞占之有興王之運天目雙峰屹立于斗牛之上海門一點橫當乎翼軫之間雖云自昔稱雄實乃形局兩弱只宜為一方之巨鎮不可作百禩之京畿駐蹕僅足偏安建都難奄九有表上竟陞杭州為臨安府而稱行在

全上

鄒寬字仲容師廖金精得其術為汪伯彥卜地葬親乃借堪輿家論貽書以動之末云方今幽燕未歸版籍朝廷有意

恢復倘值此時揚師整旅當勿計名位高卑昌言於朝奮力請進必立希世功名若叅之他見微有更改妄觸一機百關俱廢汪是其言而不能用了未拜相鄒術果奇而書中之議竟托空言

全上

王克明字彥昭饒州樂平人徙烏程初生時母乏乳餌以粥遂得脾胃疾長益甚醫以為不可治克明自讀難經素問以求其法乃愈始以術行江准入蘇湖鍼灸尤精診脉有難療者必沈思得其要然後與之藥病雖數症或用一藥以除其本本除而餘病自去亦有不予藥期以某日自安有以為非藥之過過在某事當隨其事治之言無不驗魏安行妻風痿十年不起克明施鍼而步履如初胡秉彝妻病氣祕腹脹呼號踰旬克明以半硫圓碾生薑調乳香下

之俄起對食如常廬州守王安道風噤不語旬日克明令熾炭燒地灑藥置安道於上須臾而蘇金使黑鹿谷過姑蘇病傷寒垂死克明治之明日愈及從徐度聘金谷適爲先排使待克明厚甚訶之谷乃道其故後再從呂正已使金金接伴使忽被危疾克明竝起之却其謝張子蓋救海州戰士大疫克明在軍中全活者幾萬人張欲上其功力辭之克明頗知書好俠尚義嘗數千里赴人之急初試禮部中選累任醫官王炎宣撫四川辟克明不就炎怒劾克明避事坐貶後遷至內翰林醫痊局賜金紫紹興五年卒年六十七

宋史

楊賁亨鄱陽人博羣書精脉理每心計造方有患飢者諸醫以火症治賁亨久思之未得頃見堂上木橙自仆乃爲濕氣所蒸致朽忽悟水能消物不獨屬火此濕消爾投熱劑而愈又有顯者瘴目性躁日憂切益不瘳賁亨給曰目可計日即痊第懼毒發於股又日撫其股憂之後目忽瘳而股亦無恙蓋誘其心火下降爾術遂大名於時

全上

富春子善推占嘉熙丙申客饒語人曰此州將出宰相然未見其人也他日自饒還池州又曰何爲宰相聲復在此方驚咤不自決值國忌提舉段震午而下羣集報恩寺富春子往候焉一見池教馬廷鸞驚曰此其人矣後果驗

全上

元

蔡槐號月湖德興人僑居建康少讀書卓犖不羈好相人不妄許可至元二十三年與學士傅立等偕召詔問朕壽幾何對曰仁者壽陛下壽及八旬時春宮未建嘗賜見便殿

西漢志 卷一百六
俾定儲君於諸王孫中對曰某太孫龍鳳之姿天日之表
他日必為太平天子後七年登極即成宗也久之大臣有
為姦利者請問休咎槐拒不往他日見於朝辭色甚怒槐
曰相公能憂國愛民自可享期頤之福何問為然亦懼其
讒授集賢學士辭不拜乞歸田里從之已時相果敗元貞
改元復召不赴 豫章書

梁饒德興人元季時精堪輿術一日過樂平大汾潭遇雪時
歲暮渡者李翁止宿飲至酣大呼曰世上何人能識我今
日時師後代仙李懇求吉地梁即指示穴處囑曰貴從武
功來禍後福始應葬數年李以罪戍定遠產黔寧王英明
祖育之軍中賜國姓復賜姓沐追封二代皆為王 安志
操貴持字子敬浮梁人也官教授卜筮多奇中 全上

李時茂字誠仙居至道宮有閉縱陰陽之術善役使鬼神風
雪雷雨祈禱立至鄉人稱為李神仙 府志

張愷鄱陽人良醫季民孫善療奇疾有女子阿欠兩臂直上
不能下諸藥莫治愷令其母解女子裙襦坐寢室乃揚言
醫入女忽擲手下掩體舉動遂如故又一小兒坐高處懸
跌於地瞳人倒視見房屋皆翻覆愷令有力者將小兒顛
倒數次其視即順凡藥石難療之疾愷不執方脉以意治
之無不立愈 全上

明

楊文德樂平萬全鄉人攻醫精內經太素脉明初徵入太醫
院洪武戊寅乞歸田里上書種德二字賜之舟抵饒城醫
者劉宗玉延之文德為講岐黃心法以太素授之紫極宮

西漢志 卷一百六
朱道士疾文德診之不數劑而愈朱以銀飲器謝之却再三方受中途長嘯時宗玉子烈問其嘯之故文德曰徒受其惠明年春肝木旺脾土受尅至期果死黃復昌疾文德診之曰一劑即瘥官貴脉旺秋當入仕尋以當路薦授丹陽令所著有太素脉訣一卷 安志

董德彰名潛事孀母至孝一日救白神龜夢示仙書於石巖中得之遂精堪輿不計利不能葬者助之或一葬未善復爲之遷時稱董半仙著有四神祕訣水法等書同邑程天昭十九都人著有道法雙談撼龍疑龍二經註解傳於世 德興縣志

張宗烜字明遠一都人精岐黃術著方書數千卷 同上

高道者得長桑君禁方當明初挾技遊銀陽一日值柩於途

詔之乃孕婦喪也道者驗其遺衣血曰此猶未死啓其棺一鍼而甦今傳其小兒方術無不驗者 安志

江濟字汝楫本姓鄭天順己卯舉雲南鄉試歷官同知善山

水載畫譜 浮梁縣志

程世光鄱陽人擅小兒科憲王誕長子初出胎不知吮乳曰難產傷氣持人參煎湯灌半匙即吮又舟工生子胞而無皮取土數升糝其體即成肌有胎婦兒腹啼皆不治乃傾豆於地令婦低首拾之兒啼止其醫多以意出弗拘方書神効如此 府志

孫卓三浮梁人精岐黃之學正德間邑令以宸濠之變先輿送其夫人避山中病前祕五日腹脹如鼓仰而張目息已微急召卓三曰此盛暑急驅飲水過度羞溺而胞轉也法

以猪尿胞吹氣貫滿令婢女投入衝之而溺淋淋下遂起
新安富室有男子淋溺不止者漸痿黃諸醫束手卓三醫
之亦弗効偶隱几坐以手戲弄水灌後孔塞則前竅止開
則通為腦後一穴灸火三壯立愈 安志

項世賢樂平人名嗣宗以字行幼警悟師事德興彭宗伯洞
明岐黃內經之說遇異人授以子午八法用鍼之旨不資
丸散沈疴宿疾應鍼而起人以為神邑有昇舊牀過其門
者世賢止之於朶枕中鍼出一瘵蟲殺之又至廣信有患
蘧蔭不伸者賢鍼之獲平施惠於人至老不衰 府志

蔡天竒浮梁諸生從素問本草精以深思亦不屑屑赴人之
召人有危疾問天竒天竒輒問他醫診狀或取其方增減
一二而竒中嘗示諸醫曰人有重病則我亦病病窮日夜

之思僅可得起一人汝輩慎之 安志

吳從善鄱陽人本道士善相法郡守甯某與弟貌相肖初令
假衣冠坐解中試之從善揖而不拜曰此非四品骨眾皆
失笑見稅課呂銘曰官當至二千石後果擢刑部郎出知
西安府見鄱主簿孫誕曰公本鸞鳳豈終枳棘之棲後官
遷至山西按察僉事言無不驗人呼為聾道士 府志

西渚子鄱陽人或謂其本學孝廉以卜隱遇物起數甚驗有
姓某儀賓持象牙笏問之曰簪笏之貴却緣骨月後優人
亦以簪笏往曰雖近簪笏奈體輕微居鄱久著名尋遊四
方各變名號以顯其術 安志

洪魁八樂平人世業岐黃幼得異授精於太素脉八法神鍼
邑人黎澄葉瑞當未遇時以疾延其診視輒預定其科第

與歷任地方卒之時日斷休咎死生百不失一年八十餘
無疾而坐化

全上

徐善繼德興人補邑庠生以親喪未厝與弟善述究心堪輿
之學因得吳景鸞遺書於天門白雲洞遂深明其奧旨遷
縣治易學基士大夫莫不欽其慧識所著有人子須知徐
文貞階序其書

全上

南康府

晉

幸靈建昌人性少言與小人羣居見侵辱而無愠色邑里號
之癡雖其父母兄弟亦以為癡也嘗使守稻羣牛食之靈
見而不驅待牛去乃往理其殘亂者父母見而怒之靈曰
萬物生天地之間各欲得食牛方食奈何驅之其父愈怒

曰即如汝言復用理壞者何為靈曰此稻又欲得終性牛
自犯之靈可以不收乎時樊長賓作官船於建城山令人
各作箸一雙靈作而未輸或竊之而心痛靈曰得無竊我
箸乎竊者不應頃愈急靈曰不以情告我真死矣竊者乃
出之靈飲之以水病即愈船當下吏以二百人引一艘不
能動靈請自牽之惟用百人而船去如流龔仲孺女病積
年靈以水含之而愈呂猗母皇氏得痿痺病十餘年靈療
之去皇氏數尺而坐冥目寂然有頃顧猗曰扶夫人起猗
曰老人得病多年何可倉卒起耶靈曰但試扶起俄又令
去扶即能自行遂愈高悝家有鬼怪言語訶叱投擲內室
不見人形或器物自行再三發火乃邀靈靈惟據軒小坐
而去其夕鬼怪即絕靈所救愈多類此然不取報謝行不

西江志 卷一百六
騎乘長不娶妻性至恭見人即先拜言輒自名晉書藝術傳

元

劉開字立之習釋老學嘗遊廬山遇異人授以太素脉行世
元帝召赴闕賜號復真先生卒葬於西古山安志

明

鄧霆祐號玄玄真人釣臺鄉人同表霆奎祕授符咒異術於
李玄洲凡禱雨祝晴降魔逐疫無不應也俗傳其白晝驅
雷神現形拔庭西大樹植之東邊子又玄孫重玄世傳其
術云建昌縣志

九江府

唐

白岑曾遇異人傳發背方其驗十全後為淮南小將節度高
適脅取其方然不甚驗岑至九江為虎所食驛吏於囊中
乃得真本太原王昇之寫以傳布國史補

宋

法堅廬山僧以醫名宋太祖召見賜紫方袍號廣濟大師景
德二年雍王元份久被疾召赴闕至則元份已薨還山卒
時沙門法蘊亦以善醫工診切每先歲時言人生死多中
賜紫方袍號廣利大師一時稱藥王藥上再現云安志

李仲寧九江碑工黃山谷題其居曰琢玉坊崇寧中刊元祐
黨籍姓名太守使劓之李曰小人家故貧窶因刻蘇內翰
黃學士詞翰至飽暖名為奸人誠不忍下手守義之曰賢
哉士大夫所不及也餽以酒從其請王氏揮塵錄

明

王九達字曰達德安人性疎放坐事被逮逃之吳越間遂家焉刻苦攻醫自悟心法凡遇奇病治輒應手斷除某病某經某勝某尅某逆某邪某標某本某生某死某病某日已若候朝夕一一不爽崇禎間典職太醫錢相國龍錫述其事甚詳所著有素問靈樞合類九卷又心傳九種皆刻成書何郎中萬化吳尚寶爾成韓侍讀敬序之晚念故里歸卒於家

安志

宋光紳號橫秋業儒不遇先世曰杏莊者善小兒痘症遊四方遇異人授以祕書醫由是顯其書具在光紳習焉復擅長一時人延之風雨弗避未嘗計利也一日暮歸道拾遺金啓視之則某甲輸糧者晨起詣故處望其人踉蹌來告

曰我拾得以俟君其人願分半爲壽光紳笑而遣之

彭澤縣志

花自達號喬石德化文學也父質字患痔手調飲食侍寢處六年即留心於醫所著有尊經上下二傳時王九達有素問靈樞合類之編慮其割裂顛倒尊經之旨亦孟氏不得已之心嘗著論外感如陰陽升降之候轉變順逆之機經絡上下之屬論內傷標本從違之數虛實補瀉之功寒熱溫涼之理無不井分條貫閭里爭誦之當道召之不赴貧苦無告者不召輒往治之藥餌之外且以廩肉餽順治初蕭國柱舉以自代周太守璜敦請之不就將卒附身之具一未備勉留數日問曰事畢否知草率略具起索筆硯咸謂當有遺言乃伸紙疾書曰生平無所得惟此兩玉壺一

朝帶不去撒手隨太虛擲筆而逝 府志

南安府

唐

楊玄亮襄州人久視中年二十餘於虔州汶山觀傭力晝夢見天尊云我堂舍破壞汝為我修造遣汝能醫一切病寤而說之試療無不愈者贛縣里正背有腫大如拳亮以刀割之數日平復療病日獲十千造天尊堂成遂無効 朝野僉載

宋

謝昔臣虔州術士蘇軾過虔贈詩云屬國新從海外歸君平且莫下簾帷前生恐是盧行者後學還呼韓退之死後人傳戒定慧生時宿直斗牛箕憑君為算行年看便數生時

到死時 東坡集

贛州府

唐

楊筠松竇州人僖宗朝掌靈臺地理事官至金紫光祿大夫黃巢破京城乃斷髮入崑崙山步龍後至虔州以地理術授曾文辿劉江東世稱救貧仙人是也卒於虔葬雩都藥口壩 府志

僕都監逸其名善青烏術與楊筠松俱官司天監都監因黃巢之變避地寧都縣懷德鄉以其術傳中壩廖三傳 豫章書

宋濂曰葬書始於郭景純唐末楊筠松與僕都監竊秘書中禁術自長安至寧都遂定居焉後以其術傳廖三

傳廖傳其子瑀瑀傳其壻謝世南世南傳其子永錫遂
祕而不授世之言地形者其盛無踰此數人今其書世
多行之皆與郭氏合世不信地理之術則已信之舍此
將何從求之歟元新喻劉則章有葬書註釋金華鄭彥
遠復校而刻之 宋景濂集

曾文迪零都崇賢里人師事楊筠松凡天文讖緯黃庭內景
之書靡不根究尤精地理梁貞明間至袁州萬載愛西山
之勝謂其徒曰死葬我於此卒如其言後其徒忽見於豫
章歸啓其棺無有也所著有八分歌二卷 豫章書

宋

劉江東零人楊筠松在虔州江東因同曾文迪傳其術初楊
與曾竝不著文字江東稍有口訣其裔孫謙為宋吏部郎

中知袁州事乃著囊經七篇詞旨明暢人傳誦之 安志

廖瑀字伯玉寧都人年十五通五經人稱廖五經建炎中以
茂異薦不第後精父三傳堪輿之術卜居金精山自稱金
精山人所著有懷玉經 全上

卜則巍字應天贛縣人精形家言著作甚富所傳雪心一賦
旨約而該業地理者咸宗之 全上

元

彭雷巖贛縣玉虛觀道士以祈禳方技顯於元盛時頃刻間
能致風雨人有疾病立能愈之其魑魅為怪者禁使絕跡
解學士縉謂其得劉繼先遺術云 安志

明

蕭九賢字慕白會昌人精內外諸科洪武中充里長解實竹

入都時馬后病乳癰甚危太醫罔效乃揭榜召醫九賢應
召診視投劑三日而愈授太醫院吏目馳驛歸里著有外
科啓鑰回生要義諸篇

會昌蕭氏族譜

廖均卿瑀之裔成祖卜壽陵久不得吉壤永樂七年仁孝皇
后未葬禮部尚書趙珙引均卿至昌平得縣東黃土山最
吉車駕即日臨視定議封為天壽山命武義伯王通等董
役授均卿官

安志

丘弘道雩都人博學能文得郭璞葬經究心三十年遂精其
術淺深去就皆有法與人言必以忠孝為本

劉槎翁集

劉漳贛縣人吏滿考授樂昌高勝巡檢宣廟時以寫真得幸
改鴻臚寺序班入內供奉尋陞錦衣衛鎮撫副千戶

安志

王純贛縣人工水墨畫所作人物樹石意趣天然而筆法亦

蒼古人稱為石林畫史

全上

袁峇字仰夏雩都人棄儒明醫瀕死者輒能起之鄉人召請
即地險僻天大寒暑應之無倦色又能呼風霆役鬼物歲
旱為民禱雨輒應邑東五里靈泉巖古渡下有巨潭怪物
作祟歲溺者無算峇書符焚潭中旬日雷雨晦冥山頂石
隕於潭其患遂息子淳以進士官御史

全上

國朝

羅牧字飯牛寧都人工書畫得魏石牀之法而益精寓居南
昌巡撫宋犖作二牧說贈之得冠石林峭齋芥茶法亦善
製茶巡撫郎廷極為詩紀其事牧亦能詩年八十餘海內
爭購其筆墨真蹟或不可得

府志

西江志卷第一百六

西江志

卷第一百六

五

